





順治十年癸巳春正月戊辰朔朝鮮來貢○己巳 上幸內院徧

問中書姓名見所黏小羽子鮑通事等罪案 上曰善人之名固

垂後世似此惡人之名亦垂後世語畢賜茶隨御午門令兩翼內

直侍衛自紫禁城西華門轉而疾趨有十人先至賞首至者段七

疋其餘各賞有差又諭內院諸臣曰前聞兵部尚書明安達禮等

受賄一事朕甚懣焉雖虛實尙未可知然若輩皆素所信任之人

若受賄果真卽朕亦不能自信矣諸臣奏曰誠如 聖諭○庚午

諭內三院朕稽厯代聖君良臣一心一德克致太平載諸史冊甚

盛事也朕自親政以來各衙門奏事但有滿臣未見漢臣頃經御

東華錄

順治二十

一 史條奏甚屬詳懇朕思大小臣工皆朕心腹手足嗣後凡進奏本

章內院六部都察院通政使司大理寺等衙門滿漢侍郎卿以上

參酌公同來奏其奏內事情或未當者可以顧問商酌爾等傳諭

諸臣務體朕懷各竭公忠盡除推諉以紹一心一德之盛○給事

中魏象樞奏 皇上躬親大政首舉計典恭請 皇上面召各直

省兩司等官凡三年中國賦之盈虧民生之利害官評之賢否吏

議之公私許其逐一奏陳稱職者獎賞不稱者處分儻有枝梧欺

飾科臣指名糾參庶計典昭明人心鼓勵下部速議○辛未諭內

三院近來言官條奏多係細務未見有規切朕躬者朕一日萬幾

豈無未合 天意未順人心之事良由諸臣畏憚忌諱不敢進諫

耳朕雖不德於古帝王納言容直每懷欣慕朕躬如有過失諸臣

須直諫無隱卽偶有未合不妨再三開陳庶得省改力行正道希

臣周潤瀾 王先謙敬編 瀕 瀾 蕃 恭 校 稟

臻治平進言切當者必加旌獎言之過戇者亦不譴責內三院卽傳諭大小諸臣俾咸悉朕意○壬申給事中魏象樞奏三年大計冊報責在撫按考察責在部院糾拾責在科道總爲激清吏治也查順治四年科道拾遺被處者甚多今值 聖政方新拾遺一節最爲緊要不宜藉誣罔處分科道以負 皇上求言察吏之意得旨據奏四年糾拾反坐言官有壞吏治塞言路以後科道糾拾官員照大計一例處分科道官有挾私妄糾者著吏部都察院指實參奏○癸酉 上幸內院顧謂諸臣曰向會再三敕下都察院令其條奏卿等所知後復數加面諭乃至今竟一無建白何耶又問明時票本之制如何諸臣奏曰明時京官奏疏恭進會極門中官轉送御覽畢下內閣票擬復呈御覽合則照擬批紅發出否則御筆改正發出 上曰今各部奏疏但面承朕諭同署錄出方送內

東華錄

順治二十

二

院其中或有差譌殊屬未便頃者都察院糾參吏部侍郎孫承澤通政司右參議董復原令交吏部議覆乃誤傳革職朕日理萬幾恐更有似此舛錯者若人命最重儻輕重顛倒致刑辟失宜亦未可知諸臣奏曰誠如 上諭此非臣等所敢議也唯 上裁之○

工部副理事官三都給事中姚文然奏近日兵部滿漢諸大臣皆因得罪鎖禁城門竊以諸臣官列大僚素蒙養今值嚴冬沍塞銀鐙被體無論寢食艱難日久成疾且通衢大路功貴大臣免冠帶鎖褻辱難堪非所以廣 皇仁而存國體請嗣後大臣有犯發刑部令人看守待審明定案治以應得之罪則國法 聖恩並行不悖得旨以後滿漢諸臣有犯貪惡重大事情應發刑部審問者在部守候不必鎖拏送門審有實據引律擬罪奏請處分○免陝西莊浪紅城堡洮州衛雹災額賦○甲戌諭內三院據定遠大將

軍和碩敬謹親王等差內翰林國史院侍讀學士碩代前鋒參領科爾昆奏捷云九年十一月十九日大軍抵湘潭縣賊首偽將軍馬進忠等率領馬步兵已遁往寶慶府王與眾將商議將疲弱兵馬撥兩翼委署梅勒章京二員又每旗章京二員牛彘甲兵四名留後餵養於二十一日率領官兵自湘潭縣起身向衡州府進發二十二日去衡山縣三十里前鋒遇賊哨卒追至衡山縣擊敗偽軍門一員偽副將五員馬步賊兵千八百名卽於是夜兼程前進二十三日天未明抵衡州及明王率貝勒貝子公固山額眞等向前正列陣閒賊兵卽至我兵各依所對之處衝入賊兵大敗追殺二十餘里斬獲甚多得象四馬八百二十有奇擊敗賊兵約四萬餘爾衙門轉發鈔傳○召集議政王大臣內三院滿漢九卿命內大臣伯索尼大學士范文程額色黑傳諭曰各部院奏事經朕面

東華錄

順治二十

二

諭者部臣識其所論回署錄之票籤送內院照票批紅發科如此則錯誤必多朕日理萬幾何能記憶前都察院參吏部侍郎孫承澤重聽通政使司參議董復年老原令交吏部議覆乃傳旨錯誤俱革職此尙易於改正至於罪人死軀命攸關誤免猶可儻一時誤殺悔之何及朕心惕然今後如何始得詳明俾無舛錯合於大體著定議具奏於是諸王大臣議曰 聖諭誠然今後各部院奏事各臣照常面奏候 上覽畢退 上批滿漢字旨發內院轉發該科其滿漢事件止有滿字無漢字者亦止批滿字發內院轉發該衙門其綠頭牌奏及口啟等事仍依舊制從之○丁丑調洪承疇爲內翰林弘文院大學士陳名夏爲內翰林祕書院大學士○兵部議覆給事中王廷諫奏盜賊恃窩主爲巢窟爲窩主者非地方豪惡卽投充莊頭其力足以展辨使舉報者罹反坐之條其

勢足以庇護使考問者獲違禁之罪卽欲嚴行搜捕勢有不能自  
今以後凡拏獲賊盜卽追問窩家旣得窩家卽依律究治如係莊  
頭及投充人等該地方官卽行擒拏解部仍行保甲嚴加搜捕務  
靖根株盜賊自息從之○弘文院修撰麻勒吉等奏今屢頒恩詔  
除十惡大罪外皆與宥免臣等以爲詔赦出於一時之喜慶而法  
者所以布大信於天下也歐陽修曰信義行於君子刑戮加於小  
人王通曰無赦之國其刑必平且從來詔赦除十惡不赦外其斬  
絞流徒等罪不過減等以示恩耳若全赦其罪是惡人得以幸免  
而受惡人之害者反抱怨莫伸則惡何由而懲善何由而勸請以  
後凡有詔赦俱從減等之例則 皇仁國法並行無礙下所司議

○己卯諭刑部李應試等以罪惡正法其兄弟子孫親戚皆免拏  
問令改惡遷善務爲良民爾部卽行傳諭○庚辰命隨征貝勒屯

東華錄

順治二十

四

齊爲定遠大將軍統征剿湖南大軍敕諭屯齊以下及夸蘭大以  
上各官曰我朝用兵俱以全力克敵制勝此爾等所悉知者爾等  
此番晝夜疾趨二三百里以致士馬疲勞此大失也嗣後諸事  
悉與夸蘭大等以上共相商酌敬慎而行如值渠寇應分遣眾兵  
者則於固山額眞公韓岱伊爾德二人內遣一人其一人毋使離  
爾貝勒屯齊率本旗護軍居中而營貝勒巴思漢貝子扎喀納穆  
爾祜公韓岱伊爾德當各領護衛及親軍同貝勒屯齊軍於一處  
其提問章京馬爾泰侍衛阿進土雷等宜加詳鞠有墜馬被重創  
情有可原者執解來京如果情無可原棄主奔潰者卽就被處正  
法○敕諭護軍統領阿爾津等曰爾等率師可往會湖南大軍或  
踵大軍所去之路或從捷徑而行爾等可擇便以往旣會大軍將  
爾等所領敕印付貝勒屯齊收貯爾阿爾津當同韓岱伊爾德與

貝勒同營凡事共商酌而行○諭六科朕惟內外本章關繫民生國計豈宜遲延時日舊例下部院等衙門本章六部逐月註銷立法甚善今六部等衙門速完者固有之久延者亦不少如往年部臣稽遲欵件朕察出罰治而科臣竟不豫行摘參又不具奏認罪已職不盡何以糾人著六科將六部都察院從前奉旨應銷事件挨順年月各造清冊進呈以後逐月造冊進呈俱照舊例嚴行註銷應催完者催完應摘參者摘參務使各衙門承行事件剋期註銷其行各督撫按者亦定限報完必內無留滯外無推諉庶職掌不負政治有裨若瞻徇容隱罪必不宥○以黃熙允爲刑部右侍郎

由太僕寺卿遷

○辛巳

上幸內院閱會典問大學士范文程等曰凡

定各項條例會典可備載否文程等奏曰備載

上覽吏部覆重

犯塔入未獲疏問大學士陳之遴陳名夏曰黃臚李三一小民耳

東華錄

順治二十

五

廷臣畏憚不敢舉發其故何也陳之遴等奏曰如訐奏其事

上睿明卽行正法誠善儻宥其罪則訐奏之人必隱受其害是以

畏而不敢言耳

上曰身爲大臣見此等巨惡不以奏聞乃瞻顧

利害豈忠臣耶之遴不能對是日賜內院滿漢大學士六部漢尙

書宴於中和殿奏滿漢樂○癸未耶陽撫治趙兆麟以病免○乙

酉 上幸內院謂大學士洪承疇等曰頃亂法被誅之黃臚李三

一細民耳而居住之外復多造房屋每閒修飾齊整其故何也承

疇對曰其修造房屋分照六部或某部人至或自外來有事於某

部者卽延入某部房內 上曰以一細民而越分妄行如此故天

使之敗致他家發覺得置於法耳又曰凡人惡貫滿盈不久自敗

因言及固山額真譚泰曰可惜朕亦嘗寵愛之但渠行事僭越是

亦自殞其軀也○丙戌以多羅額駙內鐸爲議政大臣○大學士

范文程等奏治天下首在用人內而部院卿寺外而總督撫鎮皆佐 皇上經理天下之大臣也今奉旨會推諸臣敢不公慎但頃刻商酌勢難詳確况拘於資格品序其中有堪任者勢不得不用一人及用後壞事又諉以會同推舉竟無任其咎者臣等竊謂與其取定於頃刻何如掄備於平時乞敕部院三品以上大臣各舉所知不論滿漢新舊不拘資格大小不避親疏恩怨取真正才守之人堪任何官開列實蹟奏明保舉各具專本奏聞一官可舉數官數官可舉一官 皇上將所舉姓名彙置御前不時召對察其議論覈其行事並視其舉主何如人則堪任與否早在 聖鑒中矣遇有缺出公會推開列職名並保舉官姓名請 皇上簡用若用後稱職量其效之大小保舉官加以優典若不稱職亦量其罪之大小保舉官議以連坐此法實行則內外皆得真才而天下

東華錄

順治二十

六

無有不法者矣從之○丁亥刑部奏九年十一月內臣部奉 上諭凡有以冤枉叩閣朕令議奏者爾部必執原議其復控情節竟不准理如前者以戶部啟心郎布丹之罪復令再議乃偏執如故及觀其案卷擬罪實屬太過諸如此類朕於爾部失望矣欽此隨經臣部查前處分巴哈納等一案亦應覆議奉有俞旨臣等議得巴哈納應復所革職覺羅碩詹車克王國光止應各罰銀五十兩削一拖沙喇哈番復其一拜他喇布勒哈番兼一拖沙喇哈番及贖身銀兩祝世允止應罰銀五十兩給還贖身銀兩復職碩色還其拖沙喇哈番從之○戊子 上幸御馬廠閱視馬匹觀睿王及一等侍衛巴哈之甲冑謂大學士范文程曰兵器固不可不備然戈甲雖備亦不可徒恃軍威軍威雖盛而德政不足以合天心順民望亦不可也文程奏曰誠如上諭○達賴喇嘛奏此地水

士不宜身既病從人亦病請告歸 上命議政王貝勒大臣會議具奏尋議喇嘛原係特召當詢其情事其言宜於我則從不宜於我則已儻不一加詢問使喇嘛含愠而去則外國喀爾喀厄魯特必叛一議不宜詢問喇嘛若詢之而不用其言喇嘛當亦含愠而去我朝荷天之佑征服各處以成大業當年並無喇嘛也喇嘛既係特召當賜以金銀段幣酌封名號給之冊印不加詢問爲便上曰不必詢問事情止令部臣往諭喇嘛所云水土不宜良是但我等始至亦嘗以水土不宜而病後乃相宜今喇嘛既來且留此從容往代噶待草青時更召外藩王貝勒等與喇嘛相會○庚寅調金之後爲左都御史由兵部尚書調以劉昌爲工部尚書由左侍郎遷○命朱國柱仍以兵部右侍郎兼右副都御史撫治鄖陽原任登萊巡撫○贈大學士希福太保諡文簡立碑廕一子中書舍人○壬辰增吏部

東華錄

順治二十

七

驗封稽勳二司員外郎各一○癸巳 上幸內院閱吏部大計疏謂大學士范文程等曰貪吏何其多也此輩平時侵漁小民當茲大察之年亦應戒慎文程奏曰彼平居未仕時亦知貪吏不可爲一登仕籍則見利智昏矣 上曰此由平素不能正心之故也苟識見既明持守有定安能爲貨利搖奪眾皆頓首稱善○更定貝勒以下及品官服俸○乙未諭禮部聞滿洲蒙古漢軍漢人及諸色人等年當幼少皆踢石毬爲戲本朝平素學習藝業騎射之暇旁涉書史各該旗牛彖及包衣牛彖卽行嚴禁○裁廣東廣州肇慶二府捕盜通判○丙申 上幸內院閱通鑑至唐武則天事謂大學士范文程額色黑甯完我陳名夏等曰唐高宗以其父太宗時之才人爲后無恥之甚且武則天種種穢行不可勝言又問上古帝王聖如堯舜固難與比倫其自漢高以下明代以前何帝爲

優對曰漢高文帝光武唐太宗宋太祖明洪武俱屬賢君 上曰

此數君又孰優名夏曰唐太宗似過之 上曰朕以爲歷代賢君

莫如洪武何也數君德政有善者有未盡善者至洪武所定條例

章程規畫周詳朕所以謂歷代之君不及洪武也文程等奏曰誠

如 聖諭○工部尚書張鳳翔年老致仕命馳驛歸里○丁酉

萬壽節 上御太和殿受朝賀賜宴畢命學士圖海召大學士陳

名夏至 上問天下何以治何以亂且何以使國祚長久名夏對

曰 皇上如天 上心卽天心也天下治平惟在 皇上 皇上

欲致天下治平惟在一心心乎治平則治平矣 上曰然其道如

何名夏奏曰治天下無他道惟在用人得人則治不得人則亂

上曰然得人如何名夏奏曰知人甚難然所以知之亦易今誠於

羣臣中擇素有德望者常賜召見訪問則天下人心鼓舞無不欲

東華錄

順治二十

宣力效能者矣 上又曰唐朝家法何以甚醜名夏奏曰由太宗

家法未善故致女主擅國禍亂蔓延然貞觀政治可比隆三代惟

能用人故耳 上又曰黃臚李三爲民大害諸臣畏不敢言鞠審

之日甯完我陳之遜默無一語叔和頽鄭親王詰責之之遜始云

李三巨惡誅之則已儻不行正法之遜必被陷害觀之遜此言豈

非重身家性命乎名夏奏曰李三雖惡一御史足以治之臣等叨

爲 朝廷大臣發奸摘伏非臣所司且李三廣通綫索言出禍隨

顧惜身家亦人恆情也今 皇上日召見臣等滿漢一體視如家

人父子自今以後諸臣必同心報國不復有顧惜矣 上又曰人

君之有天下非圖逸豫乃身當孜孜愛民以一身治天下也若圖

身耽逸樂又安望天下治平惟勤其身以茂臻上理譽流青史願

不美歟然朕雖勤於圖治豈遂無過失專賴卿等匡其不逮儻朕

躬有過慎勿諱言名夏奏曰 皇上寵眷諸臣常加誠諭人心大不同於曩時況臣受 皇上厚恩豈甘緘默但恐指陳過當耳

上又曰李三子然小民何以官民皆憚之名夏奏曰李三誠非大害官民果實畏之蓋都城五方雜處如李三者尚不乏人今日一李三正法明日又一李三出矣李三與各衙門胥役結納最廣故使人皆憚之其要莫如拔本塞源令人皆凜凜不敢效尤彼李三者何足論也 上曰李三一小人勿謂朕屢言及之朕之所以屢言者欲諸臣改心易慮有所見聞卽行陳奏耳朕自今以後不復更言李三矣又曰治天下大道已畧言之更言其小者如喇嘛豎旗動言逐鬼朕想彼安能逐鬼不過欲惑人心耳名夏奏曰 皇上此言真洞晰千載之迷嘗謂有道之世其鬼不靈光天化日豈有逐鬼之事 上又曰朕思孝子順孫追念祖父母父母欲展己

東華錄

順治二十

九

誠延請僧道盡心焉耳豈真能作福耶名夏奏曰若果有學識之人必不肯延僧道爲此者多小民耳以其愛親之誠故聖王不禁 上曰爾可將朕言傳諭陳之遴甯完我知之○復設揚州府西河船政同知

二月戊戌朔 上幸內院批閱各部奏章悉覽諸項簿籍○己亥

工部副理事官祁通格奏國家設官定有九品之制非獨以辦等級之尊卑實用以衡量功罪而使賞罰確當也臣謂滿漢世官及無世職流官同爲辦事之員當立一體之法今漢官有罪或革或降或罰其法甚備滿官與漢官其法不一滿官之中有世職而兼流官者有無世職而止有流官者宜斟酌畫一以昭 皇上賞罰大典至於滿漢職官有犯應鞭責板責者准與收贖但漢官板責折贖在革職之後滿官鞭責折贖照舊辦事似宜存其實罰而去

鞭責之虛名以全朝廷待下之體命所司詳議○庚子復設廣東開平縣○先是蒿齊忒部瞻土謝圖旣歿其妻杜圭因察哈爾汗不恤宗族擾其部曲率其子奔附喀爾喀及 太宗皇帝平察哈爾杜圭遂棄喀爾喀率子暨部眾來歸至是以其功大封爲多羅蘇勒福金封其子噶爾瑪薩望台吉爲多羅郡王○甲辰諭內院原任都察院左都御史趙開心素有直名以故起用及畀以風憲重任不言國家大事乃庇子瀆奏有孤朕望已經革職爲民永不敘用朕思開心會爲大臣以一事差謬遂永棄不用朕心終未忍然爾內院傳諭吏部仍令趙開心來京奏請定奪○吏部尙書高爾儼引疾乞休允之○丙午 上幸內院覽少詹事李呈祥條議部院衙門應裁去滿官畱任漢人一疏願謂大學士洪承疇等曰李呈祥此奏大不合理夙昔滿臣贊理庶政並有畋獵行陣之勞東華錄

順治二十

十

是用得邀 天眷大業克成彼時可曾咨爾漢臣而爲之乎朕不分滿漢一體眷遇爾漢官奈何反生異意若以理言首崇滿洲固所宜也想爾等多係明季之臣故有此妄言耳諸大學士奏曰臣等無以仰答 聖諭矣○丁未給事中劉餘謨奏周禮八議首曰議親向見宗室有犯與民無異臣謂法不可寬而體不可辱請自今除有大罪請旨定奪外餘皆斟酌輕重永除鞭鎖之條以昭睦族之恩至滿洲籍沒之法查大清律惟謀反重犯家產入官其餘不在此例並應一概除去以昭恤下同仁之誼下所司議○吏部左侍郎孫承澤奏見在吏部尙書缺出勝任者實難其人大學士陳名夏前任吏部頗能持正請令名夏分理部事必能仰副 皇上徵清之治 上以承澤職係侍郎推舉大學士兼管本部尙書有乖大體責令回奏○ 上幸內院覽孫承澤保奏陳名夏兼攝

吏部尚書疏願謂大學士洪承疇等曰朕見承澤此奏洞其隱微代爲含愧彼意允其所請而用名夏語畢復諭名夏曰爾可毋疑懼○己酉 上幸內院覽諸奏章及萬曆時史書畢言及吏部侍郎孫承澤所奏事諭大學士洪承疇等曰六部大臣互相結黨殊不合理正宜爲君爲國秉忠持義善善惡惡爲是對曰誠如 聖

諭○庚戌 上幸內院覽諸奏章至吏部侍郎孫承澤認罪疏曰此疏認罪亦理所當然又曰凡人自知有過卽行認罪或處分亦可據理速結在承問官亦復無難若以非爲是強自置辨獲罪滋大則結案難承問官亦難也洪承疇等奏曰國家設立部院各有專司會推係九卿科道事內院向無會推之例其各部亦無奏請內院會推之例伏乞敕下各衙門永爲遵守從之○辛亥 上幸內院覽諸奏章至致仕尚書張鳳翔陛辭疏謂大學士范文程等

東華錄

順治二十

十一

曰此奏情詞實出戀主之誠深爲可憫想彼繕奏時亦必墮淚朕亦以其效力有年不忍允告但因衰老自請歸里不能復留故允所請爾等可擬溫旨來奏大學士等對曰鳳翔實有戀 主之意然旣已年老則以歸里爲尙 上然之○先是鄭親王濟爾哈朗等奏李應試一案奉旨發審時大學士洪承疇反復詰問獨陳之遯默無一言臣等問其故之遯答云 皇上果立置應試於法則已如或免死則我身必爲所害是以不言夫應試一奸民耳而之遯畏懼如此其爲身謀則得矣如事君之道何密勿近地似此緘默取容之人恐不堪重職 上命之遯回奏至是之遯上疏認罪

上以之遯旣知悔過著調用以觀其自新○癸丑 上幸內院召侍講法若貞修撰呂宮程芳朝編修黃機以次問籍貫品職且欲觀其所學命各撰柳下惠不以三公易其介論一篇閱畢復召

問內院大臣所保舉大理寺少卿衛周允通政使司參議張秉貞賜茶○先是議政王九卿會議奏定各部本章 御批發出滿漢

字兼書者發科止書滿字者不發科直發該部至是鄭親王內大

臣大學士更議如兼漢字本發科而滿字本發部各科稽察遲誤

事件其事無由得知及月終內院收貯紅本時各科繳送兼書漢

字本各部繳送滿字本如此異同恐易致舛錯請嗣後不論有無

漢字本一概發科則部院六科便於登記且無舛錯從之○甲寅

命內院諸臣翻譯五經○ 上以吏部職掌銓衡關繫最重大

學士陳名夏署吏部尚書陳之遴仍以太子太保調戶部尚書○

以王永吉爲兵部尚書由戶部侍郎遷○乙卯命續順公沈永忠爲剿撫

湖南將軍鎮守湖南○以遣達賴喇嘛歸 上御太和殿賜宴並

鞍馬金銀珠玉段疋○先是少詹事李呈祥辨明滿漢一疏有旨

東華錄

順治二十

十一

切責副都御史宜巴漢等因劾呈祥譏滿臣爲無用欲行棄置稱

漢官爲有用欲加專任陰行排擠命革呈祥職下刑部至是部議

呈祥蓄意奸宄巧言亂政當棄市 上命免死流徙盛京○丙辰

諭吏部國家設翰林院衙門原爲儲養人材以充侍從之選故特

選教習滿書官員令伊等兼習滿語滿文以資奏對講讀選授之

時惟擇少年以其易於習學也今計三科之內有經六七年者有

經三四年者朕親臨內院面試若不加分別伊等何由激勸今將

通滿洲文義者三人不拘資俸以應升之缺用胡兆龍以侍講升

侍讀學士李肅以編修升中允兼編修莊同生以檢討升贊善兼

檢討其次可造者十二人沙澄王紫綬張士甄王熙艾元徵夏敷

九何采章雲鷺韋成賢高光夔李廷樞張宏俊各仍照原銜責令

勉力學習俟再試分別其全未通曉不能成文者五人范正脈張

文明朱廷燦成亮劉澤芳理應調外念伊等曾入詞林數內姑著調六部用○以張秉貞爲兵部侍郎

由通政司左參議遷衛周允爲工部侍郎

由大理寺少卿遷

○丁巳達賴喇嘛辭歸命承澤親王碩塞偕貝子顧爾瑪洪吳達海率八旗官兵送至代噶又命叔和碩鄭親王濟爾

哈朗禮部尚書覺羅郎球餞於清河○己未上幸內院閱六部

奏章畢諭吏部啟心郎甯古里曰有一部用滿洲兩尚書者可裁

去一員若設兩尚書必致推諉反誤部務○庚申諭吏部在告吏

部尚書高爾儼存心醇謹行事和平近告病謝事內院事務殷繁

高爾儼著仍以太子太保補內翰林弘文院大學士令其力疾入

院辦事勿以疾辭○以孫廷銓爲戶部侍郎

由左通政遷

○以費揚古

爲議政大臣○辛酉初精奇尼哈番任珍任興安總兵官時妻妾

與人通姦私行殺死懼罪遣家人到京行賄兵刑二部事覺下法

東華錄

順治二十

三

司勘問部議兵部侍郎李元鼎應絃金維城應革世職革任籍家

產之半尚書明安達禮侍郎覺羅阿克善啟心郎科爾可代祝萬

年高登第理事官覺羅薩賽卜兆麟應革世職革任贖身刑部尚

書劉餘祐應杖一百徒五年革職永不敘用任珍應革世職贖身

得旨李元鼎免死徒五年杖一百折贖金維城革世職一半並解

牛彖章京及部任贖身明安達禮阿克善科爾可代祝萬年高登

第薩賽等俱革世職一半並解部任卜兆麟降三級調外用劉餘

祐革職杖一百折贖任珍革世職一半○壬戌上幸內院披閱

翻譯五經諭諸臣曰天德王道備載於書真萬世不易之理也○

先是阿達哈哈番張國材奏大工肇舉材木不敷請開採雲霧等

山奉旨採木修造係工部職掌張國材生事圖利履行妄奏奉有

嚴旨何得又差家奴假充官員從人直入太和門內瀆擾甚屬可

惡張國材並代奏人著刑部嚴審定擬具奏至是部議張國材免死革職張貴亦免死鞭一百俱流徙盛京從之○癸亥大學士洪承疇范文程額色黑等人奏事 上諭曰革職御史羅國士兩疏俱自求升轉甚屬不合又諭曰凡大小各官妄得全美之材若性

生闇陋斯亦無可如何但得忠介勤慎亦自可用承疇等奏曰誠如 聖諭○以張縉彥爲山東右布政使故明兵部尚書徐爲卿爲浙江

左布政使由右參政遷○甲子喀爾喀部土謝圖汗下賁塔爾袞布奔巴世希扎穆蘇等四台吉率所屬一千七十戶來歸○浙閩總督

劉清泰奏廈門一窟係鄭逆老巢撫臣張學聖道臣黃澍鎮臣馬得功垂涎金幣乘成功他出潛師往襲悉攫其家貲以致鄭逆索償修怨海郡淪陷按臣王應元徇隱不奏深負巡方言官之職請交部議罪得旨張學聖馬得功黃澍王應元俱革職著刑部速差

東華錄

順治二十

十四

滿官拏解來京嚴訊具擬○丙寅諭禮部一代冠服自有一代之制本朝定制久已頒行近見漢官人等冠服體式以及袖口寬長多不遵制夫滿洲冠服豈難倣效漢人狃於習尚因而恣濫以後務照滿式不許異同如仍有參差不合定式者以違制定罪○授故御史張煊子基遠太常寺卿

三月丁卯朔子故國史院大學士宋權祭葬○右都御史李迎暖以病免○戊辰 上幸南臺召三院大學士翰林官尚書左都御

史從賜宴 上持弓顧謂諸臣曰我朝之定天下皆弓矢之力也曩者每歲出獵二三次練習騎射今朕躬親政事天下至大機務

至繁凡一應章奏皆朕親爲批斷日無暇晷心常念茲不忘也諸臣奏曰 皇上此言誠欲措天下於太平居安思危眞海內之福

也臣等願 皇上始終常存此念爾 上曰卿等恐朕志不堅有

違此言朕將自堅厥志卿等皆國之大臣亦當堅心輔政務使天下又安可將此言布告大小臣工勉體朕懷○ 上諭各部院本章內清字宜先書官員銜名次書謹題字據次書所條陳爲某事○ 賜太常寺卿管欽天監事湯若望號通懸教師加俸一倍賜之敕曰朕惟國家肇造鴻業以授時定厯爲急務義和而後如漢洛下閎張衡唐李淳風僧一行諸人於厯法代有損益何於日月朔望交會分秒之數錯誤尙多以致氣候刻應不驗至於有元郭守敬號爲精密然經緯之度尙不能符合天行其後晷度亦遂積差矣爾湯若望來自西洋涉海十萬里明末居京師精於象緯閎通厯法其時大學士徐光啟特薦於朝令修厯局中一時專家治厯加魏文奎等推測之法實不及爾但以遠人之故多忌成功歷十餘年終不見用朕承 天眷定鼎之初爰諮爾姓名爲朕修大清

東華錄

順治二十

五

時憲厯迄於有成可謂勤矣爾又能潔身持行盡心乃事董率羣官可謂忠矣比之古洛下閎諸人不旣優乎今特錫爾嘉名爲通懸教師餘守秩如故俾知天生賢人佐佑定厯補數千年之闕畧成一代之鴻書非偶然也爾其益懋厥修以服厥官傳之史冊豈不美哉○ 免山西岢嵐保德等七十四州縣六年逋賦代榆次等十二州縣逋賦十之七○ 己巳 上幸內院覽部院奏章畢諭曰自今部院事務停用綠頭牌各俱用本奏聞○ 諭內三院朕稽往制每科考選庶吉士入館讀書歷升編檢講讀及學士等官不與分任所以諮求典故撰擬文章充是選者清華寵異過於常員然必品行端方文章卓越方爲稱職乃者翰林官不下百員其中通經學古與未嘗學問者朕何由知今將親加考試先閱其文繼觀其品再考其存心持己之實據務求真學備朕異日顧問自吏禮

兩部翰林侍郎三院學士詹事府詹事以下各候朕旨親試分別高下以昭朕慎重詞臣之意○封喀爾喀部投誠賁塔爾爲和碩達爾漢親王袁布爲卓禮克圖郡王奔巴世希爲固山貝子扎穆蘇爲鎮國公巴拜爲三等精奇尼哈番薩喇瑚爲三等阿思哈尼哈番○免直隸薊豐潤等十一州縣九年水災額賦○庚午 上幸南苑○壬申建興京 皇陵享殿配殿門牆○詔舉先農先醫及司牲神祀典○甲戌免山西五臺縣逋賦及前年額賦之半○己卯免江西六年荒地逋賦○贈招撫江南死節鴻臚寺鳴贊黃家薰官廕○辛巳 上於南苑召漢官二品以上及諸詞臣皆集命侍衛護軍等各擐甲吹角吶喊陳列者再悉如軍律觀畢賜宴自是出南苑外行獵三日苑中網魚一日○吏禮二部議覆工科副理事官三都奏設立宗學一疏教習親王應各設在部他赤哈

東華錄

順治二十

六

哈番滿洲進士漢軍進士各一員頂帶照牛彛章京世子應各設在部筆帖式哈番滿洲進士漢軍進士各一員頂帶照拖沙喇哈番郡王應各設在官學閒散滿洲進士漢軍進士各一員頂帶照他赤哈哈番如滿洲漢軍進士不敷於舉人內考用如舉人不敷於各王護衛內選用親王郡王等滿十歲然後設立師傅宗室入學各設滿洲生員一名頂帶照筆帖式哈番各員六年滿後考取優者錄用從之○壬午厄魯特部願實汗來貢○乙酉 上還宮○丙戌 上幸內院閱部中奏疏及翻譯五經諭曰保舉之疏俱著全譯以便觀其人之品行○解刑部尙書濟席哈任調噶達渾爲兵部尙書○黑龍江烏默忒等來貢○增吏部兵刑科滿洲筆帖式哈番各一○丁亥諭內三院國家用人使功不如使過原任大學士馮銓素有才學召入內院辦事數年以來未見有所建明

且經物議是以令其致仕回籍朕思馮銓原無顯過且博洽古典諳練政事朕方求賢圖治特命起用以觀自新諭到之日卽速赴京○諭工部睿王墳園因伊罪惡竟行廢壞似屬太過其房屋門牆俱著修理柱用黑色仍令信郡王撥人看守○戊子大學士高爾儼以疾請假允之○庚寅以杜立德爲工部右侍郎由太常寺少卿遷

王宏祚爲戶部右侍郎

由太僕寺卿遷

○吏部左侍郎孫承澤以疾免○

宗人府議覆給事中劉餘謨奏查明季會典宗室雖有過犯亦不加刑今又奉旨有官爵者犯罪免其鎖拏照常察議欽遵在案則有官宗室覺羅無庸再議但未定無官宗室覺羅犯罪鎖拏鞭責之例似應依劉餘謨所請免其鎖拏鞭責所犯之罪仍照會典查議從之○辛卯諭內三院朕覽朝鮮國王所進表奏印篆止有清字無漢字著禮部卽行改鑄兼清漢篆文給賜該國王並令王國

東華錄

順治二十

七

臣民咸與知之○壬辰賜朝覲官員敕曰朕所與共圖又安兆民者惟監司守令是賴往年考績望於爾等者懇切周詳何爾等之泄泄從事也自朕親政以來更張慮其太驟而皇皇求治之心暴於天下者幾三載矣今又當大計之年而治猶未進民猶未安大者仍不法小者仍不廉致上之德意不下究下之疾苦不上聞此非爾等之過歟朕實不勝其恫切也已嚴飭所司重懲貪酷餘如例降革姑准爾等仍服原官各勉力以圖日新毋謂塗飾可以久施毋謂僥倖可以常恃正直存心清廉持己 皇天自鑒朝廷自知而民風亦自於變矣爾等恪遵朕旨以實心行實政庶幾共享和平之福朕之顯秩厚祿自不吝惜如或藐承朕旨心懷詐僞媚上虐下慢政隳操昭昭國憲必貽身家之災欲免得乎爾等其欽哉○癸巳 上幸內院覽各省官員奏章召原任大學士馮銓入

見問銓年歲幾何某科進士及歷升官品是夕召銓同大學士洪承疇范文程額色黑陳名夏入宮問翰林官賢否曰朕於翰林官躬親考試文之優劣畢見可以定其高下矣馮銓奏曰皇上簡用賢才亦不宜止論其文或有優於文而不能辦事行己弗臧者或有短於文而優於辦事操守清廉者南人優於文而行不符北人短於文而行可嘉今茲考試亦不可止取其文之優者而用之文行優長辦事有能者兼而用之可也 上曰銓之言是也○甲午詔原任弘文院大學士馮銓仍以原官辦事

夏四月丁酉 上御太和門親試兼翰林吏部侍郎成克鞏禮部侍郎張端及內三院學士劉正宗編檢以上官六十二員君子懷德論一篇請立常平倉疏一通○己亥諭副都御史宜巴漢等曰自今以後凡係機密及參劾本章俱著實封進奏○庚子 上御

東華錄

順治二十

六

太和殿召見天下朝覲官員董天機等諭曰海內黎庶困苦已極兼以旱澇益不聊生各州縣之民招聚撫恤俱惟爾等是賴今司道各官廢弛政務貪婪怠惰剝削下民種種情弊朕已洞悉茲姑准爾等仍服原官各宜殫心竭慮改過任事潔己愛民拯救疾苦使上之德澤下究則天下自致熙皞而於朕委任爾等之意亦可無負矣朕諄諄誠諭爾等聽之於耳存之於心申諭該屬各官恪遵奉行如違朕諭國憲具存法不寬貸眾官俱頓首謝○ 上幸內院將過試兼翰林銜侍郎及學士以下各官 御筆親定去留命留原衙門者照舊供職少詹事王崇簡侍讀學士喬廷桂侍讀王炳昆侍講法若貞韋成賢謝德張國素中允王一驥傳維鱗王紫綬贊善喬映伍李培真編修宋杞傅作霖王大初張宏俊張天植胡宣張道湜安渙高光夔檢討李廷樞俱從優外轉因諭吏部

曰國家官人內外互用在內者習知紀綱法度則內可外在外者諳練土俗民情則外亦可內外敷歷方見眞才朕親試詞臣量爲分別有照舊留任者有改授外任者其外任編檢以上官照詞臣外轉舊例優與司道等缺如年衰病弱者聽其請告朕仍優遣之○諭吏部都察院朕惟內外官員佐理天下外官計典十年內已三舉行京官殿最亦當察覈除吏禮侍郎及學士詹事等官朕親行考試區別其六部等衙門有老年疾病不能任事及素行不孚眾論或才力可外任者俱令各部堂官自行詳察覈覈彙送吏部都察院同吏科河南道議奏其通政使司大理寺太常寺太僕寺等衙門堂官開送吏部都察院同吏科河南道察覈具奏爾等各衙門務秉公開列俱限五日內卽爲分別不得遲延推諉以滋賄託務令各衙門官員人稱其職以佐朕圖治至意○辛丑 上

東華錄

順治二十

九

幸南臺召大學士學士及九卿漢官至 上御馬館命內大臣侍衛等分兩翼較射左翼勝馬射畢 上御南臺後殿賜宴謂大學士等曰凡保奏賢能宜開列某處籍貫初自何官升授今居何職其人才堪何事詳陳始末善蹟朕亦便於量能委任夫賢才難得任用貴稱其職今見保奏者俱未詳開始末但云某也賢堪任尙書侍郎朕俱難以遽信意必以爲有所瞻徇羣臣奏曰誠如 上諭 上又曰凡人孝莫大於事親古云父母之年不可不知承歡奉養一自父母有故豈能再得若不盡孝於生前而欲盡孝於歿後朕不以爲孝也羣臣奏曰 聖諭誠是陳之遴因奏曰臣母尙在臣雖有弟二人侍奉終不如臣親養但雖欲歸省每以 皇上恩澤深厚未敢遽請李化熙奏曰臣母亦在敢請歸省陳名夏奏曰臣父母俱於順治七年亡故會請假治喪因限期促迫權厝未

葬今乞 聖恩允臣暫請假歸葬臣所請之情更與諸臣不同

上曰爾三人之言朕悉知之○江南江西總督馬國柱奏建昌營都司鄭德陣擒僞都督陳文魁等於南豐中軍參將陳陞陣擒僞都督宋朝宗等於樂安僞伯金簡臣等於甯都○甲辰免湖南六年至九年逋賦山西夏縣荒地額糧○先是阿達哈哈番任珍家婢許任珍罪謫後家居怨望出言不軌並指姦謀陷諸醜行刑部審訊任珍應論死奉旨任珍會立大功所犯情罪亦重大可恥爾部將此本兼寫滿漢字會集九卿科道並新入旗阿達哈哈番以上官員再行定議具奏至是諸臣請如原擬大學士陳名夏尚書陳之遴左都御史金之俊等漢官二十七人一議原許重大情節任珍俱不承認若以此定案反開展辯之端不若坐以應得之罪得旨是誰展辯應得何罪著明白具奏名夏等回奏云任珍不承

東華錄

順治二十

年

大罪猶然巧辯若止據告詞定罪恐無以服其心臣等所謂恐反開展辯者此也然負恩犯法原議處死臣等所謂應得之罪者此也但律無正條似應勒令自盡得旨回奏內既云應得之罪律無正條又云似應勒令自盡勒令自盡是何盛世典例欲致君堯舜者豈有進此言之理凡人自知有過則從實引咎乃大臣之道若執爲己是以巧生事又欲以巧止事甚屬不合爾羣臣當副朕期望至意洗滌更新奈何溺黨類踵敝習著逐件再明白速奏名夏等又回奏云臣妄擬勒令任珍自盡實非盛世典例又不折其巧辯但罪以醜惡臣等之擬實屬謬誤謹束身待罪得旨朕覽回奏詞語全是蒙混枝梧竟不身任咎過更巧爲遮飾將有心之事佯作誤失大臣之道果如是乎陳名夏陳之遴等有會獲大罪者有革職者亦有被論者朕每從寬宥使之自新今復如此朕之期望

盡虛矣且屢諭眾官修省奈何依然不改踵襲宿弊一至於此朕不特召見耳提面命將此恩遇竟置何地耶理宜從重議處著內三院九卿滿漢官六科十四道翰林七品以上並六部郎中等官卽集午門外嚴行議罪作速奏聞毋得延緩於是會議名夏之過屢獲大罪俱蒙恩留用今復巧爲欺蒙俱應論死之俊職司耳目反依附黨類亦應論死尙書胡世安王永吉劉昌副都御史傅景星科臣魏象樞楊璜高桂姚文然袁懋功劉顯績御史朱鼎延馮右京張璿徇黨負恩欺誑巧飾應流徙侍郎孫廷銓張端呂崇烈張秉貞張鼎延衛周允徐起元韓源俱徇黨附和應革職永不敘用侍郎孫承澤成克鞏御史潘朝選回奏未列名應革職御史朱紱未與前議應降一級調外用得旨陳名夏陳之遴金之俊等深負朕恩本當依擬姑從寬典著各削去官銜二級罰俸一年仍供

東華錄

順治二十

五

原職陳名夏著罷署吏部事自今以後從新省改胡世安等十三員免流徙各降一級罰俸一年仍供原職孫廷銓等八員免革職各罰俸九箇月孫承澤等三員免革職各罰俸六箇月朱紱先未曾與議未詳事由免其降調○乙巳 上命大學士范文程洪承疇額色黑召集陳名夏等二十七人於午門諭曰爾等得罪悉由自陷其身也初議錯誤則亦已耳及再三申飭卽當省改豈可仍行溷議凡事會議理應畫一何以滿漢異議雖事亦或有當異議者何以滿洲官議內無一漢官漢官議內無一滿洲官此皆爾等心志未協之故也本朝之興豈會謀之爾漢官輩乎故明之敗豈屬誤於滿官之言乎奈何不務和衷而恆見乖違也自今以後務改前非同心圖效以副朕眷顧之意不然朕雖欲爾貸而國法難容至於都察院科道等官職司言路見有如此乖戾者亦當卽行

糾彈陳名夏陳之遴金之俊曰臣等仰荷 皇上厚恩乃自陷重

罪僅冀免死耳若仍留供職如斯殊典則萬不敢望一也卽受此

洪恩自分莫能仰報惟有竭駑勉效而已諸臣亦云臣等罪戾實

大恩宥至此非所望也願各改前非竭力圖報○丙午轉成克鞏

爲吏部左侍郎調孟明輔爲吏部左侍郎管右侍郎事由刑左調○以

佟國器爲右僉都御史巡撫福建由右參政管左布政使遷○丁未以圖海爲

內翰林弘文院大學士由秘書院學士遷○壬子以亢旱下詔求言諭內

外法司清理刑獄○癸丑刑部右侍郎黃熙允以疾免○刑部覆

勘任珍罪案應照原擬應論死籍沒家產具奏 上以任珍曾立

軍功免死安置盛京其子仍令襲職以彰法外之恩○甲寅諭禮

部國家崇儒重道各地方設立學宮令士子讀書各治一經選爲

生員歲試科試入學肄業朝廷復其身有司接以禮培養教化貢

東華錄

順治二十

明經舉孝廉成進士何其重也朕臨御以來各處提學官每令部

院考試而後用之誠重視此生員也比聞各府州縣生員有不遵

文義倡優隸卒本身及子弟廁身學宮甚者出入衙門交結官府

霸占地土武斷鄉曲國家養賢之地竟爲此輩藏垢納污之所又

提學官未出都門在京各官開單屬託旣到地方提學官又訪探

鄉紳子弟親戚曲意逢迎甚至賄賂公行照等定價督學之門竟

同商賈正案之外另有續案續案之外又有寄學並不報部入冊

以致白丁豪富冒濫衣巾孤寒飽學終身淹抑以及濶占優免虧

耗國課種種情弊深可痛恨今後提學御史及學道俱宜更新惕

厲嚴察前項冒濫盡行褫革大小地方人才不等酌定名數並查

舊題額例具奏定奪至於歲考除行檢問革外其文理荒謬不通

者須多置劣等嚴爲降黜其儒童經由府縣送試者詳具身家履

歷廩生保結方許入試廩生亦不得借端保結措索儒童督學諸臣如有仍蹈前弊並自甘不肖以試士爲市者許督撫巡按指實參奏如督撫巡按徇情不參聽禮部都察院禮科糾劾一併重處其人學生員提學道嚴諭府州縣衛各學教官月加課程不得曠廢亦不得假借督課陵虐諸生提學御史提學道卽將歲考場中原卷解部稽察不許換卷謄改禮部仍照舊例考定等第以示勸懲仍照解到各學廩增附名數細查在學若干名黜退若干名照報冊出示行各該府州縣張挂俾通知生員的確姓名然後優免丁糧至於河南山東等處亦照舊例優免丁糧不許濫免地土攤累小民違者究治除已往外今後各提學御史提學道誠能體朕教養儲才之心實力遵行自使士風丕變人才輩出國家治平實嘉賴之朕不靳升賞如仍沿襲陋規苟圖自利憲典具在決不寬

東華錄

順治二十

五

宥○諭戶部朕惟比年以來軍興未息催徵煩急兼以水旱頻仍深慮小民失所卽如民間充解物料款項繁多以致僉點解戶賠累難堪向會量折幾項但折少解多民不霑惠戶部等衙門作速查明有應解本色易於買辦者永遠折解前代一條鞭法總收分解責成有司小民便於輸納不受擾害國家亦收實課不致缺用立法良善見行條鞭地方著官收官解不得仍派小民其點解地方爾戶部等衙門著卽詳議具奏以便永遠通行稱朕休養斯民之意○甄別滿漢京官休致降罰有差○乙卯兵部右侍郎張鼎延以年老致仕○丁巳禮部議覆御史陳啟泰奏滿洲部院各官應照漢人例一體離任丁憂從之○遣禮部尙書覺羅郎球理藩院侍郎席達禮等齎送封達賴喇嘛金冊金印於代噶文用滿漢及圖白忒國字冊文曰朕聞兼善獨善開宗之義不同此出世間

設教之途亦異然而明心見性淑世覺民其歸一也茲爾羅布臧  
扎卜素達賴喇嘛襟懷貞朗德量淵泓定慧偕修色空俱泯故能  
宣揚釋教誨導愚蒙因而化被西方名馳東土我 皇考太宗文  
皇帝聞而欣尚特遣使迎聘爾早識 天心許以辰年來見朕荷  
 皇天眷命撫有天下果如期應聘而至儀範可親語默有度臻  
殷若圓通之境擴慈悲攝受之門誠覺路梯航禪林山斗朕甚嘉  
焉茲以金冊印封爾爲西天大善自在佛所領天下釋教普通瓦  
赤喇怛喇達賴喇嘛應劫見身興隆佛化隨機說法利濟羣生不  
亦休哉印文曰西天大善自在佛所領天下釋教普通瓦赤喇怛  
喇達賴喇嘛之印○封厄魯特部顧實汗爲遵行文義敏慧顧實  
汗賜金冊金印○戊午諭吏部工部尚書星額理藩院尚書尼堪  
效力有年衰老可念著以原官加一級致仕頤養示朕優待勳舊

東華錄

順治二十

書

之意○諭大學士馮銓曰人君用人須空鑑平衡人臣事君須去  
私秉公庶上下交泰治平可望爾馮銓曩不孚於眾論廢置業已  
二載今當圖治之時惟以爾才堪辦事不念前愆特行起用以期  
更新自召至以來讜論未聞私心已露如前日面議陳名夏等一  
事爾之所對豈實心忠良之臣肯出此言耶況爾乃密勿大臣今  
議一事如此後來用人行政將何以賴朕之素心不執己見不諱  
人過爾明白具奏以慰朕懷○己未諭吏部原任少保兼太子太  
保戶部尚書党崇雅服官潔操臣工罕覯告老回籍尤繫朕懷茲  
特加優禮准歲支原官俸薪以資頤養本處督撫按官時加慰問  
示朕眷顧清介大臣之意○偏沅巡撫金廷獻奏查獲故明福清  
王嫡子朱由杞並僞劉知府所遺文卷一箱內載故明宗族廢紳  
往來書札得旨朱由杞著卽就彼正法文書卽行焚毀若翻閱窮

究必致擾害地方所首文書內有干連者卽行釋放○以成克鞏

爲吏部尙書

由左侍郎遷

衛周祚爲刑部左侍郎

由太僕寺少卿遷

龔鼎孳爲

刑部右侍郎

由太常寺少卿遷

調衛周允爲兵部左侍郎管右侍郎事由工

右○大學士馮銓上奏引罪得旨上有所詢直言無隱臣道宜然

但馮銓與陳名夏等素相矛盾朕所悉知因言不合理是以有責

問之旨今馮銓旣知己非再觀自新仍照舊辦事以後諸臣有如

此懷私修怨不公不平者急宜省改○癸亥免福建福州等六府

九年以前荒地額賦三之一

五月丁卯諭吏部翰林官升轉舊例論資俸兼論才品朕思果有

才品特出者何必拘於舊例右春坊右中允仍管右翰林祕書院

修撰事呂宮文章簡明氣度閒雅朕所親見著遇學士員缺卽與

推補以示破格用人之意○諭吏部朕覽親政以前本章見原任

東華錄

順治二十

五

太僕寺少卿賈溶以多送監生革職原任戶科右給事中劉鴻儒

以糾拾勞有學降調原任吏科給事中林起龍以糾拾楊雲鶴革

職此三臣雖係降革皆非操守玷缺品行可議之比時方需才宜

棄短錄長俱著該地方官起送來京奏聞定奪○己巳以劉正宗

爲吏部右侍郎

由學士遷

李士焜爲工部右侍郎

由太僕寺卿遷

庚午諭內

三院朕自親政以來惓惓以吏治民生爲念每有傳諭期於大小

臣工實力遵行惟恐遲延廢闕以致詔令不信朕因時圖治提綱

挈領若宣布德意全在各衙門孜孜奉公知無不爲如朕言未當

不妨執奏更改若宜遵依卽應速爲舉行推託因循有何裨益朕

視諸臣條議有關政治者卽諭令部院作速具覆各衙門遇發下

諭旨務剋期施行以求實用若有奉行不力遲延歲月者著都察

院及科道官指名糾參以憑察處○諭吏部朕前有諭旨國家官

人內外互用在內者習知紀綱法度在外者諳練土俗民情內可  
外外亦可內外敷歷方見眞才又云爾部奏請酌議內外通用  
之法已經降旨著精詳舉行乃過月餘未見內外通用今京堂員  
缺甚多在內堪升補者作速升補其在外才品素著者照應升職  
銜通融升轉著九卿科道會同推舉以憑擢用務疏壅滯俾內外  
鼓勵以收得人之效○上幸內院問翰林各官何下直太早大  
學士范文程等奏曰今日端午是以下直較早上顧謂羣臣曰  
乘藉天休猥圖安樂人情盡然但欲希冥逸必先習勤勞俾國家  
大定其樂方永若止圖安樂嗜欲莫遏先計身家而後國是其樂  
亦暫耳卽如朕躬所行兢兢業業期於盡善故每樂聞諸臣之言  
但今之人多有能言而不能行者其故何也今日爲之明日易之  
弗克持久是以不能行耳夫人孰無過知過而改卽爲善士儻自

東華錄

順治二十

壬

掩飾謬以爲是過乃滋長咎斯甚矣朕與諸臣果能共勤政務裨  
益民生天必眷之若人之所行不善弗自省改天必降之以殃尙  
能邀眷佑乎至天不加眷佑而委命於天不知天之譴爾者以爾  
之不善也豈有爾所行善而天譴之者昔商成湯爲盛德之主猶  
且檢身不及改過不吝若明之正德帝耽志嬉遊怙過不悛徒責  
善於臣工揆之修己治人之道烏乎可縱使臣工胥善而君不改  
過遷善何由向化耶文程奏曰聖諭誠然大凡行善合天者必  
君明臣良交相釋回始克荷天休而濟國事若人主愎諫自用誰  
復進言勢必諂諛者獻媚而日親忠鯁者矢忠而日疏矣人主誠  
持己公明臣下自翻然從善斯天心眷顧國祚悠久克享太平矣  
上曰善自今以往始自朕躬有過卽改卿等亦各宜勉旃朕有  
過舉勤爲啟沃朕將殫力修省焉○辛未厄魯特部顧實汗下台

吉諾穆齊等來貢○壬申裁陝西安樂中護衛鎮羌守禦所河南

禹州守禦所○轉周亮工爲福建左布政使由右布政使轉以佟延年爲

浙江右布政使由山東按察使遷○左都御史金之俊奏大清律開載強

盜無籍沒之條近者審擬概行籍沒以致地方僉解盜屬株連無

辜自今以後仍依律處斬免其籍沒以省苦累得旨所司照律議

奏○甲戌免河南祥符等七縣九年湖廣沔陽等三州縣八年水

災額賦○吏部都察院議覆鄭親王濟爾哈朗等奏各省巡按爲

察吏安民之官近者多受屬員獻媚參劾無聞應將巡按概行停

止其十四道京畿道御史止二十員其餘俱應裁汰從之○乙亥

諭內三院朕惟修己治人大經大法備載經史欲與翰林諸臣明

其義理但內院尚非經筵日講之地著工部卽將文華殿作速起

造以便講求古訓○封精奇尼哈番鄭芝龍爲同安侯子成功爲

東華錄

順治二十

海澄公弟鴻逵爲奉化伯芝豹爲左都督錫之敕諭曰朝廷報功

必隆其典臣子效順各因其時茲爾鄭芝龍當大兵南下未抵閩

中卽遣人投順移檄撤兵父子兄弟歸心本朝厥功懋矣睿王不

體朕心僅從薄敘猜疑不釋防範過嚴在閩眷屬又不行安插恩

養以致闔門惶懼不能自安雖鄭芝豹音信尙通而鄭成功鄭鴻

逵恩養遂阻加以地方撫鎮道官不能宣揚德意曲示懷柔反貪

利冒功妄行啟釁廈門之事咎在馬得功而鴻逵遵依母教遂爾

旋師足見諸臣身在海隅不忘忠孝朕甚嘉之已將有罪官將提

解究擬卽遣人齎敕傳諭開導歸誠成功鴻逵果令李德持家書

來並傳口語芝龍隨卽具奏書詞雖涉矜誕口語具見本懷朕念

爾等前有功而不能自明後有心而不能上達君臣誼隔父子情

疏爾等不安於衷亦已久矣朕親政以來知百姓瘡痍未起不欲

窮兵爾等保眾自全亦非悖逆今以芝龍首倡歸順賞未酬功特封爲同安侯錫之誥命芝龍子成功爲海澄公芝龍弟鴻達爲奉化伯芝豹爲左軍都督府左都督總兵官各食祿俸如例成功鴻達另有專敕芝豹遇缺推補朕推心置腹不吝爵賞嘉與更始猶慮爾等疑畏徘徊茲特遣官黃徵明往諭敕諭到日滿洲大軍卽行撤回閩海地方保障事宜悉以委託爾等當會同督撫商酌行事應奏聞者不時奏聞爾等受茲寵命果能殫心竭力輯甯地方實爾等之功如或仍懷疑慮不肯實心任事以致地方不安非徒誤朕封疆亦且擾爾桑梓揆情度理爾等量必不然況爾等父兄在朕左右子弟盡列公侯懷君德則爲忠臣體親心則爲孝子順兄志則爲悌弟此爾等千載一時之遇也可不勉哉前差黃正陞已經議卹以官今奉差之黃徵明及往來李德等事竣之日各加

東華錄

順治二十

天

官賞朕命重申服之無斃欽哉○命駐防江甯府昂邦章京喀喀木爲靖南將軍帥師征廣東逆寇賜之敕曰今逆賊侵犯廣東肇慶等處地方以爾喀喀木爲靖南將軍同梅勒章京噶來道膺總統官兵前赴廣東平南王尙可喜靖南王耿繼茂處將延擾廣東賊寇與二王相機剿除其未服本省府州縣等處地方亦與二王相機剿撫凡事與梅勒章京等會議而行○達賴喇嘛自代噶起程命貝子吳達海餞之○免山東歷城等六十九州縣八年九年水災額賦○丙子諭內三院朕仰承 天眷統一區宇深惟我

太祖武皇帝肇造艱難

太宗文皇帝大勳克集誕佑朕躬以有

今日自登極以來睠懷

陵寢輒思展謁但彼時朕年冲幼未獲

舉行每屆祀期瞻仰

在天之靈徘徊几筵不禁隕涕以致寢食

俱廢日夜靡甯今將躬詣

山陵稍展孝思議政諸王大臣滿漢

九卿等官其詳議以聞○定旌表宗室節孝貞烈例○左都御史屠賴等奏自古帝王勦業莫不寵眷勳舊我朝定鼎功臣後有獲罪者概黜其官似覺太過以後宜計其罪之重輕念其功之大小酌量處分庶 皇恩廣被於元臣與古帝王報功之意允協下所司議○左都御史金之俊奏直隸江南江北提學員缺宜以詞林簡用從之○己卯諭兵部天下初定瘡痍未起加之比年水旱民不聊生飢寒切身迫爲盜賊及至官兵捕剿玉石難分魁惡雖多翦除株蔓豈無冤濫況當年沈陷情事不同或見迫於貪污或偏脅於渠寇旣爲賊黨自拔無門念此人民皆朕赤子生聚最難摧殘極易若概加誅戮深可憫傷茲特降殊恩曲加赦宥自今順治十年五月二十五日以前凡有嘯聚山林劫掠道路會爲土賊者無論人數多寡罪犯大小但能真心改悔自首投誠悉准照曹四

東華錄

順治二十

无

達子事例盡赦前罪仍著所在官司酌量安插兵卽補伍民卽歸農不願還鄉者聽其隨處居住俱不許將吏有司及讐怨之家挾制嚇詐告擾侵害如有故違者該督撫應參奏者參奏應處治者處治其受撫人眾須痛改前非革心安業不許倚恃受撫名色欺壓良民儻或違犯定行追論國法森嚴斷不再宥著該部作速行文各地方督撫轉行所屬於通衢道路徧張告示曉諭通知仍將撫過人數安插事實不時奏聞○庚辰鄭親王濟爾哈朗等以南方用兵請緩躬詣 山陵得旨覽王等奏欲朕以 太祖 太宗

安定天下之心爲心具見爲國惴忱但朕追念 深恩昊天罔極

顧瞻 山陵以日爲年卽今日未可必行擬於來年躬詣爾諸王

大臣勿阻朕誠禮部可記朕諭屆期豫行擇吉具奏○命內外熱審於每年小滿後三法司會審見監人犯笞罪釋放徒流以下減

等發落重囚可矜疑者奏請定奪直隸各省歲一舉行逃人三次處絞從刑部尚書李化熙請也○子川湖總督羅繡錦祭葬立碑贈兵部尚書廕一子入監讀書○癸未免三山煤稅並裁造辦火炭主事一著爲令從工部尚書劉昌請也○刑部尚書李化熙奏乞終養許之命馳驛還里○乙酉追封 太祖武皇帝伯額爾袞爲多羅郡王諡慧哲界堪爲多羅郡王諡宣獻弟雅爾哈齊爲多羅郡王諡通達達爾漢巴圖魯貝勒舒爾哈齊視其子鄭親王濟爾哈朗爵爲和碩親王諡曰莊鎮國公祜塞視其子康郡王傑書爵爲多羅郡王諡忠順○免湖廣武昌漢陽黃州安陸德安荊州岳州九年旱災額賦○庚寅諭內三院湖南兩廣地方雖漸底定滇黔阻遠尙未歸誠朕將以文德綏懷不欲勤兵黷武而遠人未喻朕心時復蠢動若全恃兵威恐玉石俱焚非朕承 天愛民本

東華錄

順治二十

三

念必得夙望重臣曉暢民情練達治理者假以便宜相機撫剿方可救甯朕徧察廷臣無如大學士洪承疇著特升太保兼太子太師內翰林國史院大學士兵部尚書兼都察院右副都御史經畧湖廣廣東廣西雲南貴州等處地方總督軍務兼理糧餉聽擇扼要處所駐紮應巡歷者隨便巡歷撫鎮以下聽其節制兵馬糧餉聽其調發一應撫剿事宜不從中制事後報聞滿兵或留或撤酌量卽行具奏文武各官在京在外者應取用者擇取任用升轉調補隨宜奏請吏兵兩部不得掣肘應用錢糧卽與解給戶部不得稽遲歸順官員酌量收錄投降兵民隨宜安插事會可乘卽督兵進取時當防守則慎固封疆各處土司已順者加意綏輯未附者布信招懷務使近悅遠來稱朕誕敷文德至意功成之日優加賞俟地方既定善後有人卽命還朝慰朕眷懷應給敕諭印信作

速撰鑄給與卽傳諭該部遵行○壬辰以張秉貞爲刑部尙書部左侍郎遷○以山東左布政使耿焯爲通政使○贈殉難桃源縣知縣鄭朝肅香山縣知縣張令憲桃源縣典史王應星官○免直隸霸保定等三十一州縣九年水災額賦

六月乙未朔追封塔察篇古爲多羅貝勒諡恪恭青巴圖魯貝勒穆爾哈齊爲多羅貝勒諡勇壯○原任左都御史趙開心奏湖廣巡撫遲日益偏沅巡撫金廷獻卽襄撫治趙兆麟所轄地方盜賊充斥奇荒異蓄所在見告賊至則相率而逃至兵丁譁擾焚燬民居並未聞設法剿撫溺職殊甚所當亟行更易勿令貽誤地方得旨地方關繫首在巡撫豈容庸碌充任貽害封疆以後用人須慎加選擇趙兆麟已有旨察議遲日益金廷獻著議處速奏○丙申經畧大學士洪承疇奏臣年逾六十理宜退休乃蒙 皇上特畀

東華錄

順治二十

三

經畧之任伏讀 聖諭信臣任臣懇至周詳臣當盡心竭力以期剿撫中機無負 皇上承天愛民本念伏願 皇上勿忘今日信任初心時諭吏戶兵三部仰承 天語遵依條款毫無改易俾臣得以竭蹶展布庶可報隆恩於萬一得旨卿練達民情曉暢兵事特假便宜往靖南服一應調度事機悉以委託距京雖遠眷注彌殷務殫忠猷副茲信任凡有奏請朕靡不曲體內外諸臣須同心共濟著照傳諭遵行○洪承疇奏辭太保新銜不允○丁酉諭內三院帝王化民以德齊民以禮因奸人爲惡害及良善所以不得已而用刑然必情罪允孚斯加之者無悔而受之者無怨故法者天下之平朕亦不得任喜怒爲輕重也凡官民犯事朕卽有意見不肯遽自裁斷必下部議者以士師之任職在明允而膺斯任者又皆親信大臣必能仰體朕心審察得情不至有錯誤寬濫之失

今該部不體朕意私心揣度以爲事經上發若從輕擬恐以情面生疑庇護獲咎因爲自全之計明知此罪本輕故爲重入待朕親裁甚至新犯事情可就事論事而追引已結之舊案文致重法如此私心舛謬大不合理朕於政事最重刑獄奏讞本章必再三覆閱每有改正但慮日有萬幾或一時不及致詳竟批依議死者不可復生誤者不可復改此悔此怨咎將誰歸朕志存愛育於飢寒爲盜之民尚許自首退方未服之眾廣示招徠況於有職朝臣無知黎庶卽有應得之罪尚不忍加豈肯陷以刻深致滋冤濫以後問理衙門議事大臣問擬人罪務要詳審真情引用本律一切鈞索羅織悉宜痛革書云罪疑惟輕所當深念如情罪重大憲典具存又不得借口故出以致漏網務平心守法使人不冤以幾刑措之治爾內院卽傳諭刑部著通傳內外問理各衙門一體遵行仍

東華錄

順治二十

五

刊刻告示俾王以下及各旗官民悉知朕意一應奏章案牘須兼用滿漢文字以便通曉○弘文院大學士高爾儼引疾請休溫旨允之○戊戌廷試歸旗遼人柯汝芝等六十九名上上卷授知縣上卷通判○辛丑裁山海關道缺歸併承平道轄○癸卯復秋決朝審例從刑部尚書李化熙請也○甲辰賜故江西巡撫夏一鶚祭○乙巳諭吏部湖南湖北疆境遼闊軍務甚繁著祖澤遠專督湖廣其四川兵馬錢糧皆從陝西調發境壤相連著孟喬芳兼督四川各換敕與之廣東廣西應設總督一員著速推堪任者具奏○丙午遣官祭故定南王孔有德諡武壯○免浙江慈谿等五縣八年水災逋賦○達賴喇嘛來貢○丁未喀爾喀部鄂齊賴土謝圖汗丹津喇嘛車臣汗等奏自遣貝子大臣議盟以來正欲酌量定約而我貝子等又有逋逃往者今旣欲約盟應遵諭歸還之巴

林人畜卽向敗盟逃往之貝子取償所餘人口望與貝子一併發還○辛亥禮部奏明末殉難忠臣大學士范景文戶部尚書倪元璐左都御史李邦華副都御史施邦耀太常寺少卿吳麟徵左庶子周鳳翔檢討王偉都給事中吳甘來御史王章陳良謨左中允劉理順馬世奇主事成德金鉉駙馬都尉鞏永固等十五員應加旌卹前太監王承恩死節已經立碑賜地春秋供祭今景文等殉君盡節亦應給諡賜祭以慰忠魂得旨范景文等給諡賜祭依議行王承恩從君殉節可嘉非可限以常例雖已立碑旌表賜地供祭還與他諡范景文等仍於各原籍照例賜地春秋致祭○戶兵工三部遵諭改折各直省本色錢糧歸於一條鞭法總收分解請永爲例從之○壬子吏部議覆經畧大學士洪承疇保舉原任大學士李率奏堪任兩廣總督一疏得旨李率奏本當永不敘用既

東華錄

順治二十

卷

經畧輔臣保爲兩廣總督特允所舉著改過自新以圖報稱○轉

衛周允爲兵部左侍郎命工部左侍郎杜立德以原銜管兵部右

侍郎事轉李士焜爲工部左侍郎以傅景星爲工部右侍郎

由左副都

御史○設六科漢軍副理事官各二○癸丑定遠大將軍貝勒屯

齊等奏逆賊僞安西王李定國僞國公馬進忠率馬步賊兵四萬

餘至永州臣等以西安府兵暨提督總兵官柯永盛兵駐衡州大

軍於二月十三日向永州進發二十八日抵永州李定國已遁度

龍虎關而去又聞僞秦王孫可望親率賊兵來靖州僞將軍馮雙

禮率二萬餘來武岡州大軍於三月初六日自永州向寶慶進發

十五日擒生口問訊具言馮雙禮白文選馬進忠率賊四萬餘營

於岔路口三十里外周家坡孫可望在寶慶我軍遂宿岔路口次

日前進見賊營於山頂據地頗險日暮天雨不便進攻列陣相抵

至夜孫可望率全軍來自寶慶與馮雙禮等軍合十七日賊眾十萬下山環陣進薄我軍我軍分兵奮擊斬殺甚眾獲馬匹七百餘象一隻軍器無算得旨貝勒等破賊立功深可嘉尙有功人員著

察明議敘○丙辰轉黃紀爲陝西左布政使由湖廣右布政轉陳極新爲

山東左布政使由江南北布政使轉以魏執中爲福建右布政使由河南按察使遷

王顯祚爲山西右布政使由福建按察使遷白本贊爲山東按察使由陝西榆

林道參○己未復設江南宣府臨清薊密鼓鑄鑪共三百四座○

庚申 慈甯宮成○以李率秦爲兵部尚書兼右副都御史總督

兩廣○廣東左布政使胡章奏臣司藩粵東星馳赴任行至中途

聞靖南王耿繼茂平南王尙可喜屬下官兵有擄掠鄉紳婦女及

占住藩司公署濫委署官等事臣思自古親王藩封天子使吏治

其國而納其貢稅焉不得暴彼民也二王不過以功受封宜仰體

東華錄

順治二十

音

聖明憂民至意安地方以安百姓斯爲不負恩命乃所爲如是

臣安敢畏威緘默自負厥職况公署被占臣莅任無地伏乞敕下

二王還官署以肅體統釋虜俘以慰子遺命靖南王平南王回奏

○敕諭喀爾喀部鄂齊賴土謝圖汗車臣汗丹津喇嘛等曰前敕

令爾等將我巴林人口歸還並遣爲首貝子來朝以謝擅掠巴林

牲畜之罪其逃來之人俟彼時酌處今抗違前旨不遣爲首貝子

來朝又不進本年常貢牲畜不盡償巴林人口爾等負罪實多反

以歸順朝廷之貝子擅來奏取昧理甚矣今縱盡償巴林人口遣

貝子來朝其已經投來貝子大臣朕亦不卽遣還惟將巴林人口

盡數歸我且遣貝子來朝庶自此以後再有逃來之人俟彼時酌

量施行否則豈但已投貝子不卽遣還凡貝子大臣來歸者卽盡

收養且寵以富貴矣○辛酉諭內院綸扉爲機密重地事務殷繁

宜選賢能以宏匡贊每院應設漢官大學士二員著吏部詳察實行確舉堪任者奏聞○內院奏請以翰林五品以下官提督直隸江南江北學政其學習滿書者不差報可○贈陣亡都司蘇尙義鄭輔陳廷佑李朝烈左子佑吳景懋守備蔣守廉王士華劉輔朝濮尙武王宗武祖孚望朱啟鳳王宏儒趙應元談天授病故都司高雲龍王國瑜王光表何官守備呂孟告周拜泰郭近功曹國鼎黃天祿朱三重張萬倉張永芳盛德俊王文蔚郝國珍羅景奎官○壬戌贈殉難袁州府知府于躍龍官廕○吏部奏滿洲蒙古漢軍官員有管旗下事者有在部院理事熟練者不便照漢官一例丁憂議在家居喪一月卽出辦事仍私居持服三年從之○癸亥諭內院朕稽考官制唐虞夏商未用寺人自周以來始具其職所司者不過閹閹灑埽使令之役未嘗干預外事秦漢以後諸君不

東華錄

順治二十

壹

能防患乃委以事權加之爵祿典兵干政流禍無窮豈其君盡闇哉緣此輩每以小忠小信固結主心日近日親易致潛持朝政且其伯叔弟姪宗族親戚實繁有徒結納搢紳關通郡縣朋比夤緣作奸受賄窺探喜怒以張威福當宮廷邃密深居燕閒稍露端倪輒爲假託或欲言而故默或借公以行私顛倒賢奸溷淆邪正依附者巧致雲霄迂抗者謀沈淵窅雖有英毅之主不覺墮其術中權旣旁移變多中發歷觀覆轍可爲鑒戒但宮禁役使此輩勢難盡革朕酌古因時量爲設置首爲乾清宮執事官次爲司禮監御用監內官監司設監尙膳監尙衣監尙寶監御馬監惜薪司鐘鼓司直殿局兵仗局滿洲近臣與寺人兼用各衙門官品雖有高下寺人不過四品凡係內員非奉差遣不許擅出皇城職司之外不許干涉一事不許招引外人不許交結外官不許使弟姪親戚暗

相交結不許假弟姪等人名色置買田屋因而把持官府擾害人民其在外官員亦不許與內官互相交結如有內外交結者同官覺舉院部察奏科道糾參審實一併正法防禁既嚴庶革前弊仍明諭中外以見朕酌用寺人之意內院卽傳諭該衙門遵行著刊刻滿漢字告示自王以下以及官吏軍民人等咸宜知悉

閏六月丙寅以成克鞏爲內翰林祕書院大學士由吏部左張端爲

內翰林國史院大學士由吏部左劉正宗爲內翰林弘文院大學

士由吏部右以林德馨爲左副都御史由湖廣左贈殉難川

東道僉事王興國南漳縣知縣姚延儒訓導賀泰來典史濮昌國

官廕○壬申增宗人府漢啟心郎一○乙亥 上朝 皇太后於

慈甯宮○以金之俊爲吏部尙書由左都呂宮爲吏部右侍郎由

書院學士由吏部轉呂宗烈爲禮部左侍郎以高珩爲禮部右侍郎由國史

院學士東華錄 順治二十 庚辰諭內三院考之洪範作肅爲時雨之徵天人感應理本

不爽朕朝夕乾惕冀迓時和乃茲者霖雨而月歲事堪憂都城內

外積水成渠房舍頽壞薪桂米珠小民艱於居食婦子嗷嗷甚者

傾壓致死深可軫念揆厥由來皆朕不德所致朕當一意修省祇

懼天戒爾大小臣工俱宜各盡職業共圖消弭京城內外確察被

蓄戶口據實登聞在外督撫凡有水蓄地方皆察明被蓄分數具

奏請恤以昭朝廷軫恤窮黎實意○辛巳賜經畧大學士洪承疇

蟒朝衣袍帽帶鞞襪松石嵌撒袋弓矢鞍轡二副馬五匹及洪承

疇奏請同往之精奇尼哈番以下拖沙喇哈番以上李本深八十

七員賞朝衣袍帽帶撒袋弓矢刀鞍轡馬匹有差○敘固山額真

一等伯墨爾根侍衛李國翰破王永強劉文秀軍功升爲三等侯

○丙戌裁山海副將一兵六百名遵化副將一兵四百名山海道

中軍一標兵百名太平喜峯馬蘭松柵等南臺守備四改設遵化  
遊擊一○戊子復以趙開心爲左都御史○贈殉難建安縣知縣  
李永華官廕○南贛巡撫劉武元以疾免○琉球國中山王世子  
尙質來貢兼繳故明敕印○己丑涼步輦成

東華錄

順治二十

七

臣王先謙敬編

臣周潤蕃恭校

秋七月乙未敘恢復廣東功加廣東巡撫李棲鳳兵部右侍郎南  
贛巡撫劉武元太子太保兵部尚書○丁酉左都御史屠賴等奏  
臣等捧讀雨潦修省之諭仰見 皇上洞悉百姓疾苦恤民之意  
切矣憶 太祖 太宗時 上天垂象甘霖屢沛者以皆合天道  
而行也今 上天仁愛微災示儆臣等謂宜集思廣益日與內外

大臣講究正道宏納讜言向來部院事務俱諸臣面奏近見本章  
時有寺人接進臣子不得進見萬一漸爲成例則 君臣之間恐

致疏遠矣今修造乾清宮設立司禮監等衙門二事雖屢經奉旨  
臣等竊有管見蓋軍民飢苦尚未休息邊境盜賊大兵征剿尚未

東華錄

順治二十一

掃除所需錢糧不貲京中給養官兵未之餘積去歲南方亢旱北  
地水澇今年六月大雨連綿房舍傾頽田禾淹沒民間疾苦昭然  
可見宜暫停乾清宮工以此項錢糧給養軍民俟盜息民安修造  
未晚至前代不似我朝左右有內大臣侍衛隨從內務有包衣大  
臣章京管理今奉 上諭設立司禮監等衙門寺人與近臣兼用  
夫宮禁使令固不可無寺人但不必專立衙門名色止宜酌量與  
近臣兼用以供使令可也得旨此所奏是但朕因連日違和未得  
接見大臣必不洽爲成例乾清宮乃朕所居處工價物料俱經備  
辦擇吉興工已有前旨今總管內事乃勳舊大臣忠誠爲國朕自  
無慮萬一有如冷僧機其人者專權作弊何以防察因分設衙門  
使各司其事庶無專擅欺蒙之患衙門雖設悉屬滿洲近臣掌管  
事權不在寺人且所定職掌一切政事毫無干預與歷代迥不相

同著仍遵前旨行○戊戌和碩叔鄭親王傳集諸王貝勒貝子內大臣固山額真內院大學士六部都察院堂官會議以今年雨澇異常奏請暫停宮殿工程以錢糧賑濟軍民 上曰王等所奏甚是宮殿以及各項工程俱令停止以休養軍民各處田地著速行踏勘賑濟事宜勿得延緩自諸王以至各官凡祭祀飲食概宜從儉朕亦自圖節省如有積穀富室願捐助者聽其捐助戶部登記數目酌與獎勵卽一體通行傳諭○辛丑以宜永貴爲兵部右侍郎兼右僉都御史巡撫南贛由倉場侍郎遷○壬寅給事中王禎奏邇者霍雨爲災河水汎濫沿河一帶城郭廬舍漂沒殆盡直隸破水諸處萬民流離扶老攜幼就食山東但逃人法嚴不敢收留流民嗚號轉徙乞飭下該督撫行文各屬使流民各投供單書明籍貫家口無隱匿逃人甘結該管官照單安置庶可救此數萬生靈下所

東華錄

順治二十一年

十一

司速議○丙午諭內三院朕奉 聖母面諭予居深宮之中不聞

外事近知雨潦爲災房舍傾頽田禾淹沒兵民困苦深可憫惻特發宮中節省銀八萬兩賑濟滿漢兵民朕仰承 慈旨命爾等傳

諭戶工二部卽將發去銀兩查照被災輕重酌量散給仍設法稽察毋致侵冒蒙混務俾貧苦之人均霑實惠以昭 聖母德意○

庚戌 皇第二子福全生○辛亥諭內三院朝廷設立言官原爲繩愆糾謬事關朕躬尙許直言無隱况諸司過失理當糾舉其言果當宜虛心靜聽卽言有未當止宜分晰事理聽候朕裁豈容違私報復近見科臣言事該部回奏輒援引律文欲以箝制言官自匿己非若如此是使人不敢指摘任意所爲而上無由知殊負朕任人求治之心向來未經申飭不諳規矩姑不深究以後斷宜切戒言官論事亦須明白確指不得摭拾風影挾私妄訐著通行嚴

飭○調馬鳴佩爲總督倉場侍郎由戶部調○甲寅以范達禮爲戶部

侍郎由副都御史遷○乙卯戶部會同九卿議奏疏通錢法以後鑄錢務

照定式每文重一錢二分五釐精工鑄造背面鑄一釐兩字每千

文作銀一兩嚴飭內外上下畫一通行如有不遵者治以重罪其

見行舊錢原有高低厚薄不等難以強齊一切貿易似應暫從民

便至外省錢法應責成右布政使專督嚴查得旨聞向來官鑪夾

帶私鑄尤爲病國再犯者照枉法贓治罪其私鑄奸民不時嚴緝

若仍前違犯事發該地方官根究重處○丙辰以林天擊爲湖廣

布政使司參政管左布政使事由江甯副使遷曹國柄爲湖廣右布政使

由廣東按察使遷○己未以張朝璘爲副都御史由梅勒章京遷○庚申諭內三

院廣東賊勢潰散地方漸平且去湖南遼遠應專任兩王及該督

撫料理江西切近湖南一應用官調兵事宜時有關涉袁州吉安

東華錄  
順治二十一  
三  
一帶餘賊未靖應撫緝剿禦著經略輔臣洪承疇兼理敕印卽與

換給○辛酉 上聞喀爾喀舉兵內向命安郡王岳樂爲宣威大  
將軍統兵戍歸化城  
八月甲子朔喀爾喀額爾德尼哈談巴圖魯等來貢○丁丑先是  
睿王多爾袞專政潛有異志 上嘗幸睿王邸第隨駕內大臣及  
侍衛等不及二十人一等侍衛喀爾喀圖聞之懼有叵測急歸家挾  
弓矢追從密爲防衛至是 上嘉其忠誠不怖死特賞十丁之莊  
一鞍馬全副銀五百兩升二等阿達哈哈番爲一等阿達哈哈番  
○贈殉難靖州知州沈一恒官廕○壬午以 太宗皇帝第十四  
女和碩公主下嫁平西王吳三桂子應熊○平南王尙可喜等奏  
官兵復化州及吳川縣○甲申更定武職品級省城掌印都司從  
二品參將正三品遊擊都司僉書省屯操都司行掌印都司行屯

操都司俱從三品守備正四品署守備從四品守禦所千總正五

品衛千總從五品○丙戌以雷興爲右副都御史巡撫河南

原任陝西

撫○丁亥大學士馮銓陳名夏成克鞏張端劉正宗奏今日禮部

諸臣至內院恭傳 上諭察前代廢后事例具聞臣等不勝悚懼

竊惟 皇后母儀天下關繫甚重前代如漢光武宋仁宗明宣宗

皆稱賢主俱以廢后一節終爲盛德之累望 皇上深思詳慮慎

重舉動萬世瞻仰將在今日得旨據奏皇后母儀天下關繫至重

宜慎重舉動果如所言皇后壺儀攸繫正位匪輕故廢無能之人

爾等身爲大臣反於無益處具奏沽名甚屬不合著嚴飭行○已

丑諭禮部朕惟自古帝王必立后以資內助然皆慎重遴選始可

母儀天下今后乃睿王於朕幼冲時因親定婚未經選擇自冊立

之始卽與朕志意不協宮闈參商已歷三載事上御下淑善難期

東華錄

順治二十一

四

不足仰承 宗廟之重謹於八月二十五日奏聞 皇太后降爲

靜妃改居側宮○庚寅禮部尚書胡世安侍郎呂崇烈高珩奏夫

婦乃王化之首自古帝王必慎始敬終今於本月二十六日忽奉

上諭今后不能祇承 聖意降爲靜妃臣等思八年冊立之初

恭告 天地 宗廟布告天下今二十五日奏聞 皇太后卽日

降爲靜妃 聖諭中未言及與諸王大臣公議及告 天地 宗

廟臣等職司典禮所奉敕諭若不傳宣恐中外未悉若遵奉傳宣

恐中外疑揣伏願 皇上慎重詳審以全始終以篤恩禮下議政

諸王貝勒及大臣內三院九卿詹事六科都給事中各掌道御史

會議具奏○禮部儀制司員外郎孔允樾奏臣辦事署中偶聞廢

后一事不覺悚然及見馮銓等奉 聖諭內有故廢無能之人

一語更爲驚駭竊思天子一言一動萬世共仰况我 皇太后正位

三年未聞顯有失德特以無能二字定廢嫡之案何以服 皇后之心且何以服天下後世之心臣考往古如漢之馬后唐之長孫后敦樸儉素皆能養和平之福至於呂后武后非不聰明穎利然傾危社稷均作亂階今 皇后不才能表著自是天姿篤厚亦何害乎爲中宮而迺議變易耶設 皇后必不諧 聖意亦可做舊制選立東西二宮共襄內治若夫廢 后一節千古典禮所在一時風化攸關實有驚人耳目者且 皇上親政以來天下以爲堯舜復生今忽有非常之舉傳之聖子神孫豈開國之主所宜有耶臣思 皇上天下之父 皇后天下之母父有出母之議爲人子者卽心知母過尚不免涕泣以諫况絕不知母過之何事又安忍緘口嚴父之側而不爲母一請命乎臣忝承聖裔兼任職官安敢存畏斧鉞顧身家之心一念孤忠伏乞 聖鑒並下諸臣議○

東華錄

順治二十一年

五

辛卯廣西巡撫陳維新奏逆賊李定國自肇慶直犯平樂府江道周永緒平樂府知府尹明延平樂縣知縣涂起鵬富川縣知縣華鍾俱遇害○贈故浙閩總督兵部右侍郎陳錦爲兵部尚書廕一子入監讀書○以劉元爲河南按察使

由陝西河西道參政遷 董應魁爲

福建按察使

由山東驛傳道參政遷

御史宗敦一潘朝選陳棐張椿杜果

聶玠張嘉李敬劉秉政陳自德祖永杰高爾位白尙祖建明奏臣等捧讀降 母后爲靜妃之諭又見故廢無能之人之旨不勝驚

駭伏思宮闈之化莫盛於成周文王之妃太姒嗣徽太任止頌幽閒貞靜之德而不及其才能誠以母儀萬國表正六宮非才能外

見之難而純德內蘊之爲難 皇后未聞失德忽爾見廢非所以

昭示風化也今 皇上復允禮臣之請救諸王大臣會議在諸臣

必以綱常爲重而臣等猶有過慮者誠恐綸音一播不無爲 聖

德累伏乞收回成命以俟會議 宗廟社稷實式臨之 上以宗  
敦一等明知有旨交議瀆奏沽名下所司議處

九月癸巳朔諸王貝勒及大臣內院九卿詹事科道等遵旨會議  
禮部尚書胡世安等及儀制司員外郎孔允樾所奏實係典禮常  
經 皇上冊立 皇后之詔祇告 天地 宗廟上 昭聖慈壽

恭簡皇太后徽號以昭慶典既已詔布天下禮難輕易伏乞 皇  
上仍以 皇后正位中宮卽命禮臣考據典禮選立東西兩宮則  
本支日茂 聖德益光可爲萬世法矣得旨朕納后以來緣志意  
不協另居側宮已經三載從古廢后遺議後世朕所悉知但勢難  
容忍故有此舉著議事諸王貝勒大臣及會議各官再議具奏漢  
官諸臣規諫其意固在愛君然必須真聞確見事果可行朕自聽  
從若全無聞見以必不可從之事揣摩進奏欲朕必從冀免溺職

東華錄

順治二十一年

六

之咎非所以盡職也孔允樾奏內云未聞顯有失德不知母過何  
事等語如果知無過之處著指實具奏○丙申禮部儀制司員外  
郎孔允樾奏臣奉旨指實回奏切念小臣雖在輦轂之下一歲之  
中除郊祀朝見得以仰觀 天顏餘亦無由覲 聖况 皇后居  
深宮之中其有過無過非惟人臣不及知亦人臣不敢知但臣守  
有祖訓惟知事君如事父痛念父母偶有不諧已屬人倫之變爲  
人子者若再順言母過以重父之怒此不待問而知爲逆子矣臣  
前奏一則曰未聞失德再則曰不知母過亦不過仰冀 君父動  
悔悟之機開慈母一遷善之路以自附於幾諫之義而其實無有  
他慮也臣恐天下謂 皇上容保萬邦而不能容一后後世責臣  
等義當匡贊而不能匡一母是以旣奉嚴綸之後冒死陳奏臣今  
日可以對 皇上異日可以對臣祖要亦惟此一念耳今 聖諭

內有云從古廢后遺議後世是 皇上曉然於古今之大倫又云  
諸臣規諫意在愛君是 皇上又洞白諸臣之苦心 聖明在上  
臣復何言惟有席蓐待罪靜聽處分而已報聞○加致仕巡撫河  
南兵部尚書吳景道一級廕一子入監讀書以其撫豫有年勞績  
茂著也○丁酉叔和碩鄭親王濟爾哈朗等會議廢后事奏言所  
奉 聖旨甚明臣等亦以爲是無庸更議得旨廢后之事朕非樂  
爲但容忍已久實難終已故有此舉諸王大臣及會議各官既其  
以爲是著遵前旨行○戊戌贈殉難巡按廣西御史王荃可官○  
癸卯理藩院奏喀爾喀部土謝圖汗下索諾額爾德尼遣阿顏齊  
等進駝馬至張家口外請旨定奪下議政王貝勒大臣議尋議前  
有旨與喀爾喀若全歸我巴林之人遣爲首貝子謝罪來朝爾時  
再爲酌定今應遣啟心郎鼐格等往視若巴林之人果已全還爲  
東華錄

順治二十一

七

首貝子來朝則令彼進口否則逐之報可○乙巳授拜他喇布勒  
哈番張勇爲三等阿達哈哈番以其投誠兼著戰功也○丁未烏  
斯藏來貢○壬子命刑部復三覆奏例○丙辰耿繼茂喀喀木克  
潮州○丁巳逆渠孫守金僞宜川王朱敬鐸盤踞紫陽糾連川湖  
諸孽負固十年總督孟喬芳遣總兵官趙光瑞等討平之捷聞下  
部察敘

冬十月癸亥朔命田雄移駐定海○乙丑直隸山東河南總督馬  
光輝漕運總督沈文奎奏膠州逆鎮海時行叛亂臣等統兵渡黃  
河追至永城兩路夾擊俘斬甚多時行勢窮殺其黨渠李進文等  
率子弟及舊部赴軍前降下所司敘卹海時行等令議罪○丙寅  
遣固山額真濟席哈等率師剿山東土寇○辛未裁直隸大沽遊  
擊一歸併葛沽營改紫荊路隸眞定鎮裁畿南額兵千一百名白

石口兵五十名增紫荆關兵五十名裁山東沂州鎮遊擊二守備一千把總六臨清城守營千把總三兵三百名壽張營兵三百名○己卯諭內三院朕居深宮之中未嘗備悉民間疾苦聞爾來兵民凍餒流離載道朕深疚心寢食不安今欲拯救兵民之疾苦必何策而後可著議政諸王貝勒及大臣內三院九卿詹事六科都給事中各掌道御史會同酌議具奏○兵部奏叛鎮海時行等稱王僭號殺官屠城勢窮就撫應斬以徇從之○庚辰定遠大將軍和碩敬謹親王尼堪靈櫬回京命和碩親王以下二品官以上出郭十里迎既至上欲親臨其喪諸王大臣以彼地出痘力諫乃止○同安侯鄭芝龍奏前命招撫逆弟鴻逵逆子成功功臣卽遣人貽書宣傳 聖意俱未受封 上以鄭成功妄行索地誇詐大言其欲不可饜足著議政王貝勒大臣確議以聞○壬午卹敘州重

東華錄

順治二十一年

八

慶陣亡將士有差○癸未致仕左都御史房可壯卒○甲申喀爾喀部土謝圖汗下索諾額爾德尼來貢○乙酉命設粥廠賑京師饑民○免直隸通密雲等七州縣水災額賦○丙戌先是叛民朱由極自稱爲故明泰昌第三子逆黨楊得先等推以爲主造僞札僞印煽惑鄉民妄授官職招集黨羽潛謀不軌至是爲宛平縣民甯忠弼等所首命王大臣等會鞫得實磔爲首者七人斬附從者二十二人○戊子先是各部奏事畢仍攜本章回部擬旨方送內院每致舛錯後於奏事時奉 御批卽發內院至是 上以章奏繁多若竟送內院又恐易滋弊竇命和碩鄭親王同諸大臣更議尋議於太和門內擇一便室大學士學士等官分班入直本章或上親批或於 上前面批若有應更改之事卽面奏更改庶幾無弊從之於是規定大學士學士名次爲二直更番在內辦事○

遣禮部右侍郎高珩諭祭明末殉難諸臣范景文等十六人各予諡范景文曰文忠倪元璐曰文貞李邦華曰文肅施邦耀曰文愍吳麟徵曰貞肅周鳳翔曰文介汪偉曰文毅吳甘來曰莊介王章曰節愍陳良謨曰恭潔劉理順曰文烈馬世奇曰文肅成德曰介愍鞏永固曰忠烈金鉉曰忠潔太監王承恩曰忠節○諭內大臣巴圖魯公鰲拜伯索尼曰覽刑部奏言緝拏逆賊夥黨並獲有未經薙髮優人王玉梁七十二人供稱身係戲子欲扮女妝以故未經薙髮如我等入各省俱有等語前曾頒旨不薙髮者斬何嘗有許優人鬻髮之令嚴禁已久此輩尙違制畜髮殊爲可惡今刊示嚴諭內外一切人等如有託稱優人未經薙髮者著遵例速薙頒示十日後如有不薙髮之人在內送刑部審明正法在外該管各地方官奏明正法若知而不舉無論官民治以重罪其傳諭刑部

東華錄

順治二十一年

九

速行刊示○庚寅給事中魏裔介奏拯救兵民八事一發倉減價糶與八旗及京師窮民一流民所至地方官給印票准其入籍墾荒一流民既棄其鄉所遺戶丁差徭卽行豁免一各處給發軍餉取營兵實收結狀每季彙報以杜侵剋一各撫鎮死亡兵馬未支糧餉宜分賞見在軍士一查荒不許過一月其已蠲者有司造冊呈報使民需實惠一存留錢糧如里馬鄉飲修署坊銀諸不急務清算節省以備賑貧一災傷地方禁屠戶乘賤宰殺耕牛下所司酌議

十一月丙申設遼陽府附郭遼陽縣改海州爲海城縣○以謝道

爲福建右布政使

由江南按察使遷

○戊戌敕諭靖海將軍海澄公鄭成功曰朕臨御天下思與百姓休息底於太平有負固不服者則兵

之其有輸誠國家矢忠宣力者爵賞曷有靳焉爾父鄭芝龍首先

投順忠誠可嘉特畀爵世世延賞復封爾爲海澄公泊爾叔等一門盡被恩榮朕豈憚於用兵如此哉但以爲力服明威何如示恩示信爾不卽祇承敕印仍遣李德等來爾父持爾書入告朕覽書內有君擇臣臣亦擇君之語爾來投誠正是擇君朕破格委任正是擇臣君臣一心至誠相待何有不信之處又云爾父爲貝勒所給屈抑數年爾父在睿王時果有猜疑看守之事朕親政以來優厚大臣加升爾父官爵同國家勳舊諸臣恩禮罔間想爾亦悉知之又云一攻一議二三其令因固山額真奉命在先劉清泰招撫在後及爾差人一到卽令撤兵何嘗失信又云三府屯兵並轄三省沿海地方原敕止有泉州等處並未有三府之說此傳言之誤爾言一府未足屯兵未爲不是故益以三府又云島上諸紳籍沒已盡府道縣視爲奇貨或亦有之諸人果非叛逆有司何得執

東華錄

順治二十一

十

問但旣係叛逆窮究黨與亦未爲過又云分爲五等上爵充總兵官尙在提督之下似爲有理故命爾挂靖海將軍印又云用人莫疑疑人莫用朕因不疑故授爾以封爵委以海上之事如有所疑豈肯加封委任又云父親致力於內兒盡力於外付託得人地方安靜此言殊爲合理朕再三宣諭不欲加兵爲地方頻年兵火之苦暨父子間隔之情爾卽多所詞說皆所不計復念爾兵卒眾多一府難以安插錢糧委難支給仍益以漳州潮州惠州三府並泉州四府駐紮卽將四府水陸寨遊營兵餉撥給爾部下弁兵不足不另補正課錢糧仍行解部管民文官俱聽部選爾原轄武官聽爾遴委仍將姓名職銜具奏造冊送部開洋船隻爾得稽察收納課稅送布政使司解部朕待爾推心置腹毫無猜疑爾受茲敕印速宜安插兵丁防勦海賊所轄將士嚴行約束勿擾百姓上以報

朕委任之意下以全爾等歸命之忠爾能積功累勞仍有懋官懋賞主臣相得垂諸史冊豈不休哉爾其欽承之○乙巳降河南巡撫王亮敕二級調外用以徇庇學臣黃日祚及違例收用舊承差故也○吏部奏新推道臣房之騏歷任山東置買田宅旣經山東

薦舉復用北直保結銓選之日不聲說回避應革職得旨房之騏

情弊爾部原知如何屢駁方行指出倏升倏革是何議法堂司官

俱著回奏○戊申以亢得時爲右副都御史巡撫河南由國史院侍讀學士

遷○偏沅巡撫金廷獻以病免○己酉吏部以房之騏一案引罪

回奏聽候處分得旨議政王貝勒大臣詳確議處○川陝總督孟

喬芳奏西甯孫家寨回民據寨叛副將狄應魁等擊之生擒逆黨

祁敖牙固子等埽其巢穴下所司敘卹○辛亥戶部議准科臣李

開生奏請立限報災夏災限六月終秋災限九月終先將被災情

東華錄

順治二十一

十一

形馳奏隨於一月之內查覈輕重分數奏請蠲豁其逾限一月內者巡撫及道府州縣各罰俸逾限一月外者各降一級如遲緩已甚者革職永著爲例報可○乙卯議政王貝勒大臣等議奏房之騏銓補山東驛傳道一案以吏部尚書朱瑪喇等初謬執之騏爲北直籍貫有旨察議仍巧言支飾以不回避之罪歸之之騏至屢旨詰問方行認罪並出結少卿郝傑監丞潘士章等分別降革罰俸得旨朱瑪喇贖身革尚書任屯泰甯古里鏗特科爾坤希特訥崔世祿杭愛楊雀祥鍾有鳴苗澄宜圖金光祖俱贖身畱任木成格罰俸六箇月金之俊罰俸一年調用孟明輔呂宮馬光裕各罰俸一年宋學洙先後巧辯革職永不敘用房之騏革職永不敘用郝傑潘士章各罰俸六箇月○以蘇納海爲吏部侍郎由弘文院學士遷

○丙辰諭吏部總督管轄數省巡撫專任一方得其人則事治民

安非其人則叢奸滋弊民受其害如不行考覈賢否無辨何以示勸懲著以順治十一年正月起爾部會同都察院矢公矢慎將各地方總督巡撫嚴加考覈分別確議具奏不許通賄私行蒙蔽徇縱向來推用督撫但止舉侍郎布按嗣後遇有督撫員缺不拘品級務從公會推擇其品行才猷素著者將政績事實詳註會推本內毋得聽受鑽營濫舉匪人朕以激清吏治責之督撫考覈督撫責之部院如推舉不公著都察院科道官指實糾參○諭吏部朕圖治方般用賢爲急原任戶部尙書党崇雅清勤素著前雖告老歸里才品實堪委任茲特起用著諭到之日卽速赴京朝見不得引年託辭○諭吏部吏部居六部之首人才用舍治亂攸關今尙書員缺宜慎加選用朕觀弘文院大學士劉正宗清正耿介堪充此任特升一級加太子太保管吏部尙書○刑部侍郎伊爾都齊

東華錄

順治二十一年

十一

緣事解任○免江南旱災州縣額賦有差○戊午工部議覆御史高爾位奏籍沒官屋每城撥八間增置棲流所以處饑民報可○浙閩總督劉清泰等奏江浙會剿將領陳陞等自均潭進攻九仙山賊寨逆首楊文中礮死賊弟楊富賊將劉理順等勢窮乞降餘黨悉平下所司敘卹○己未免江西五十四州縣旱災額賦○庚申經略大學士洪承疇奏楚省寇亂多年人知逆賊孫可望等抗拒於湖南而不知郝搖旗一隻虎等肆害於湖北今湖南分駐重兵足備防剿而各郡寫遠不免首尾難顧之憂其荊州賊孽儻或由澧州而犯常德或截岳州以犯湘潭則我軍腹背受敵臣與督臣議臣宜往來長沙四應調度督臣移駐荊州提督標下官兵宜赴荊州鄭襄間聽調仍俟另撥各營官兵增武昌城守以壯聲援又奏頃桂林雖復其實附郭止臨桂一縣外郡止靈川興安全州

三州縣而已逆賊李定國距省僅二百里眈眈思逞滿洲援剿官兵豈能定畱將來恢復州縣何以分守兵至則賊退兵去則賊復合彼逸我勞甚犯兵家之忌又若孫逆探我兵出援因以靖沅賊兵截粵西險道則我首尾難顧反置孤軍於徼外種種危形顯然易見目前已嚴促所調官兵速往協同戰守俟臣親歷衡永再商機宜以聞俱下所司速議

十二月癸亥諭吏部朝廷設立言官原爲矢忠進諫糾彈不法近來言官未見有建白切當及糾參顯要者皆因懼被論之人反唇仇訐遂爾緘口自今以後凡被論者如有辯處止許就所參事款據實剖白不許反唇仇訐有乖法紀言官亦不得挾私誣捏自取咎戾其參奏公私當否或見任或升任考察京官之時該部院分別覈奏以爲勸懲爾部卽行嚴飭○諭吏部原任戶部尙書謝啟

東華錄

順治二十一

五

光前雖革職回籍朕聞其幹練有才且使功不如使過特予起用以觀自新著作速赴京○黑龍江鄂爾多科等來貢○丙寅以固山額眞陳泰爲定南靖寇大將軍與固山額眞藍拜濟席哈護軍統領蘇克薩哈等統兵鎮湖南 上又念比歲不登芻糗缺乏從征將士馬多羸瘦若令自爲飼養恐難贍給分別量支銀兩騎兵無馬者每牛彘發馬十匹復諭統兵固山額眞護軍統領梅勒章京等曰前軍失機俟到日議處我朝用兵從無此失爾等遇有軍機會同各營將領商酌而行悉心無隱蓋師行原有一定紀律大小將佐果爲國盡力豈致挫衄尙其勉之慎勿藐視主帥更須撫勵士卒果能愛眾而得其心安有遇敵而不爭先效命者乎○丁卯以呂宮爲內翰林弘文院大學士由吏部右侍郎遷○以馮聖兆爲右副都御史巡撫偏沅原任宣府巡撫○以阿達哈哈番博博爾代爲議政

大臣○以阿思哈爲刑部侍郎

由梅勒章京遷

○戊辰贈殉難廣西府江

道周永緒右江道金漢蕙知府尹明廷知縣涂起鵬華鍾四川安

縣道參議梁一訓官廕○庚午諭平西王吳三桂曰朕惟折衝禦

侮社稷良臣報德崇功國家盛典爾平西王吳三桂英才自命雄

略羣推早識天心先歸王室子居甥館親聯帶礪之間身受藩封

寵列公孤之右曩入關破寇從定中原暨銜命撫秦其平西陝蓋

忠勤之備至亦威惠之交孚繼以巴蜀跳梁特命陳師致討成都

諸邑悉隸版圖保郡餘氛旋成殄滅厥功懋矣朕甚嘉焉聿彰圖

閣之猷爰申詔祿之典茲將功次續入冊內又於藩俸六千兩外

加俸一千兩以報勤勞嗚呼元老壯猷忠尚資於頗牧戚臣宣力

誼更篤於腹心王其鞏固封疆殫抒籌策績益宏於勘定盟永重

於河山尚克祇承無斃朕命○辛未 上幸南苑○甲戌吏科副

東華錄

順治二十一

西

理事官彭長庚奏凡八旗世胄之臣在各衙門供職者偶有過失

止應革其衙門職銜在旗下犯事者止應革其旗下職掌近或因

衙門小過並革其世職是以微瑕而累全瑜似屬可惜請今後凡

陞前疏虞者議革世職其他一告止就職掌處分庶賞罰克當下

部確議○免浙江金華九年旱災額賦○癸未致仕少保戶部尚

書党崇雅奏臣蒙 聖諭召臣赴京特恩起用誼不敢辭但臣母

八旬奄奄卧病臣年七十老態備見儻復任臣以官必致溺職乞

收回成命臣母與臣共戴 皇仁得旨卿回籍逾歲清操懿行實

企朕懷今覽所奏以親病不忍遠離且言衰老步履艱難情詞懇

切但朕求賢圖治惓念老成年雖七十猶堪任事宜勉遵前諭速

著來京君親兼顧忠孝兩全卿心安朕懷亦慰○命和碩敬謹

親王尼堪子尼思哈襲爵○設兵部督捕滿漢侍郎各一增司官

各六另設公署專理緝捕逃寇事務○以阿達哈哈番羅畢爲議

政大臣○轉高珩爲吏部右侍郎以梁清標爲禮部右侍郎

由陝學士○陝西四川總督孟喬芳引疾請代 上念其勤勞素著命

加少保馳驛回京調理○甲申免河南開封彰德衛輝懷慶汝甯

九年十年水災額賦○丙戌江甯巡撫周國佐奏海逆入犯吳淞

遣副將張思達參將雷應春等出洋進剿將士奮勇轉戰一百四

十餘里殺賊無算參將張其業楊國海先登陣歿命所司敘卹○

丁亥 上還宮是夜地震有聲○是歲人丁戶口一千三百九十

一萬六千五百九十八田地山蕩三千八百八十八萬七千九百

二十六頃三十六畝畦地二萬二千九百八十八箇徵銀二千一

百二十八萬七千二百八十八兩四錢米麥豆五百六十七萬二

千二百九十九石九斗有奇草二百九十萬九千一百一十八束

東華錄 順治二十一 五

中茶三萬七千三百五十錠行鹽三百七十六萬一千五百三十

八引徵課銀二百一十二萬八千一十六兩二錢鑄釐錢二十五

萬二千一百六十六萬三千七百四十文有奇舊鑄銅錢二十一

萬三千三百七十文有奇鈔一十二萬八千一百七十二貫四百

七十文有奇



